

ओं नमः परमात्मने, श्री महागणपतये नमः,
श्री गुरुभ्यो नमः, ह॒रिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

सप्तमकाण्डे पञ्चमः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Contents

7 कृष्ण यजुर्वेदीय तैत्तिरीय संहितायां सप्तमं काण्डं	4
7.5 सप्तमकाण्डे पञ्चमः प्रश्नः – सत्रविशेषाभिधानं.....	4

Version Notes

1st Version Number 0.0 dated 30th Nov 2019

2nd and Current Version Number 0.1 dated 31st March 2020

1. This Version replaces earlier version “0.0” dated 30th Nov 2019.
2. We have incorporated TS 7.5 Samhita Vaakya corrections only in this version.

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

7 कृष्ण यजुर्वेदीय तैत्तिरीय संहितायां सप्तमं काण्डं

7.5 सप्तमकाण्डे पञ्चमः प्रश्नः – सत्रविशेषाभिधानं

TS 7.5.1.1

गावो॑ वा ए॒तत् स॒त्र-मा॑सताशृ॒ङ्गाः स॒तीः शृ॒ङ्गाणि॑ नो जायन्ता॒ इति॑
कामे॑न तासां॒ दश॑मासा निषण्णा॒ आस॑न्नथ शृ॒ङ्गाण्यजा॑यन्त
ता उ॒दति॑ष्ठन्नराथ्स्मेत्यथ॒ यासां॑ नाजायन्त॒ ताः सँव॑त्सर-मा॒प्त्वो॒दति॑ष्ठ-
-न्नराथ्स्मेति॒ यासां॑ चाजायन्त॒ यासां॑ च न ता उ॒भयी॑रु-दतिष्ठ-
न्नराथ्स्मेति॒ गोस॑त्रं वै – [] 1

TS 7.5.1.1 - Padam

गावः॑ । वै । ए॒तत् । स॒त्रम् । आ॒स॒त । अ॒शृ॒ङ्गाः । स॒तीः । शृ॒ङ्गाणि॑ ।
नः । जा॒यन्तै॑ । इति॑ । कामे॑न । तासां॒ । दश॑ । मा॒साः । निषण्णा॒
इति॑ नि – स॒न्नाः । आ॒स॒न् । अथ॑ । शृ॒ङ्गाणि॑ । अ॒जा॒यन्त॑ । ताः ।
उ॒दि॒ति । अ॒ति॒ष्ठ॒न् । अ॒राथ्स्म॑ । इति॑ । अथ॑ । यासां॒ । न ।

अजा॑यन्त । ताः । सँ॒व॒थ्स॒रमि॑ति सं – व॒थ्स॒रम् । आ॒प्त्वा । उदि॑ति ।
अ॒ति॒ष्ठ॒न् । अ॒रा॒थ्स॒म् । इति॑ । या॒साम् । च । अजा॑यन्त । या॒साम् ।
च । न । ताः । उ॒भयीः॑ । उदि॑ति । अ॒ति॒ष्ठ॒न् । अ॒रा॒थ्स॒म् । इति॑ ।
गो॒स॒त्रमि॑ति गो – स॒त्रम् । वै । 1 (50)

TS 7.5.1.2

सँ॒व॒थ्स॒रो य ए॒वं वि॒द्वा॒ऽसः॑ सँ॒व॒थ्स॒र-मु॑प॒यन्त्य॑द्द॒ध्नु॒वन्त्ये॒व तस्मा॑त्
तू॒प॒रा वा॒र्षि॑कौ मा॒सौ प॒र्त्वा च॑रति स॒त्राभि॑जित॒ऽह्य॑स्यै तस्मा॑त्
सँ॒व॒थ्स॒रस॒दो यत् किं॑ च गृ॒हे क्रि॒यते॑ तदा॒प्त-म॑व॒रुद्ध॑-म॒भिजि॑तं
क्रि॒यते॑ स॒मु॒द्रं वा॑ ए॒ते प्र॑ प्ल॒वन्ते॒ ये सँ॒व॒थ्स॒रमु॑प॒यन्ति॒ यो वै
स॒मु॒द्रस्य॑ पा॒रं न प॑श्यति न वै स त॒त उदे॑ति सँ॒व॒थ्स॒रो – [] 2

TS 7.5.1.2 - Padam

सँ॒व॒थ्स॒र इति॑ सं – व॒थ्स॒रः । ये । ए॒वम् । वि॒द्वा॒ऽसः॑ ।
सँ॒व॒थ्स॒रमि॑ति सं – व॒थ्स॒रम् । उ॒प॒यन्ती॑त्युप – यन्ति॑ ।
ऋ॒द्द॒ध्नु॒वन्ति॑ । ए॒व । तस्मा॑त् । तू॒प॒रा । वा॒र्षि॑कौ । मा॒सौ । प॒र्त्वा ।
च॒रति॑ । स॒त्राभि॑जितमि॒ति स॒त्र – अ॒भिजि॑तम् । हि । अ॒स्यै ।

तस्मात् । सँवथ्सरसद इति सँवथ्सर – सदः । यत् । किम् । च ।
गृहे । क्रियते । तत् । आप्तम् । अवरुद्धमित्यव-रुद्धम् ।
अभिजितमित्यभि – जितम् । क्रियते । समुद्रम् । वै । एते । प्रेति ।
प्लवन्ते । ये । सँवथ्सरमिति सं – वथ्सरम् । उपयन्तीत्युप-यन्ति ।
यः । वै । समुद्रस्य । पारम् । न । पश्यति । न । वै । सः । ततः ।
उदिति । एति । सँवथ्सर इति सं – वथ्सरः । 2 (50)

TS 7.5.1.3

वै समुद्रस्तस्यैतत् पारं यदतिरात्रौ य एवं विद्वाँसः सँवथ्सर-
मुपयन्त्यनार्ता एवोदृचं गच्छन्तीयं वै पूर्वोऽतिरात्रो ऽसावुत्तरो मनः
पूर्वो वागुत्तरः प्राणः पूर्वोऽपान उत्तरः प्ररोधनं पूर्व उदयनमुत्तरो
ज्योतिष्ठोमो वैश्वानरो ऽतिरात्रो भवति ज्योतिरेव पुरस्ताद्धते सुवर्गस्य
लोकस्या-नुख्यात्यै चतुर्विंशः प्रायणीयो भवति चतुर्विंशति-
रर्द्धमासाः – [] 3

TS 7.5.1.3 - Padam

वै । स॒मु॒द्रः । तस्य॑ । ए॒तत् । पा॒रम् । यत् । अ॒ति॒रा॒त्रा॒वित्य॑ति-रा॒त्रौ ।
ये । ए॒वम् । वि॒द्वाँ॒सः । सँ॒व॒त्स॒रमि॑ति सं - व॒त्स॒रम् ।
उ॒प॒य॒न्तीत्यु॑प - य॒न्ति॑ । अ॒ना॒र्ताः । ए॒व । उ॒दृ॒च॒मित्यु॑त् - ऋ॒चम् ।
ग॒च्छ॒न्ति॑ । इ॒यम् । वै । पू॒र्वः । अ॒ति॒रा॒त्र इत्य॑ति - रा॒त्रः । अ॒सौ ।
उ॒त्तर॑ इत्युत् - त॒रः । म॒नः । पू॒र्वः । वाक् । उ॒त्तर॑ इत्युत् - त॒रः ।
प्रा॒ण इति॑ प्र - अ॒नः । पू॒र्वः । अ॒पा॒न इत्य॑प - अ॒नः ।
उ॒त्तर॑ इत्युत् - त॒रः । प्र॒रो॒ध॒नमि॑ति प्र - रो॒ध॒नम् । पू॒र्वः ।
उ॒द॒य॒नमि॑त्युत्-अ॒य॒नम् । उ॒त्तर॑ इत्युत् - त॒रः । ज्यो॑ति॒ष्ठो॒म इति॑
ज्यो॑तिः-स्तो॒मः । वै॒श्वा॒न॒रः । अ॒ति॒रा॒त्र इत्य॑ति - रा॒त्रः । भ॒व॒ति॑ ।
ज्यो॑तिः । ए॒व । पु॒र॒स्तात् । द॒ध॒ते॑ । सु॒व॒र्ग॒स्येति॑ सु॒वः - ग॒स्य॑ ।
लो॒क॒स्य॑ । अ॒नु॒ख्या॒त्या इत्य॑नु - ख्या॒त्यै । च॒तुर्विं॑श
इति॑ चतुः - विं॑शः । प्रा॒य॒णी॒य इति॑ प्र - अ॒य॒नी॒यः । भ॒व॒ति॑ ।
च॒तुर्विं॑शतिरिति॑ चतुः - विं॑शतिः ।
अ॒र्ध॒मा॒सा इत्य॑र्ध - मा॒साः । 3 (50)

TS 7.5.1.4

सँव॒थ्स॒रः प्र॒यन्त॑ ए॒व सँव॒थ्स॒रे प्र॒ति ति॒ष्ठन्ति॑ तस्य॒ त्री॒णि च॒ श॒तानि॑
ष॒ष्टिश्च॑ स्तो॒त्रीया॒स्ताव॑तीः सँव॒थ्स॒रस्य॑ रा॒त्रय॑ उ॒भे ए॒व सँव॒थ्स॒रस्य॑
रू॒पे आ॒प्नुव॑न्ति ते सञ्स्थि॒त्या अ॒रि॒ष्ट्या॒ उत्त॑रैर॒होभि॑श्चरन्ति षड॒हा
भ॒वन्ति॑ षट् वा ऋ॒तवः॑ सँव॒थ्स॒र ऋ॒तुष्वे॒व सँव॒थ्स॒रे प्र॒ति ति॒ष्ठन्ति॑
गौश्चाऽऽ*यु॑श्च म॒द्ध्य॒तः स्तो॒मौ भ॒वतः॑ सँव॒थ्स॒रस्यै॒व तन्मि॑थुनं
म॒द्ध्य॒तो –[] 4

TS 7.5.1.4 - Padam

सँव॒थ्स॒र इति॑ सं – व॒थ्स॒रः । प्र॒यन्त॑ इति॑ प्र – यन्तः॑ । ए॒व ।
सँव॒थ्स॒र इति॑ सं – व॒थ्स॒रे । प्र॒तीति॑ । ति॒ष्ठन्ति॑ । तस्य॑ । त्री॒णि ।
च । श॒तानि॑ । ष॒ष्टिः । च । स्तो॒त्रीयाः॑ । ता॒वतीः॑ । सँव॒थ्स॒रस्येति॑
सं – व॒थ्स॒रस्य॑ । रा॒त्रयः॑ । उ॒भे इति॑ । ए॒व । सँव॒थ्स॒रस्येति॑
सं – व॒थ्स॒रस्य॑ । रू॒पे इति॑ । आ॒प्नुव॑न्ति । ते । सञ्स्थि॒त्या इति॑
सं-स्थि॒त्यै । अ॒रि॒ष्ट्यै । उत्त॑रैरि॒त्युत् – त॒रैः । अ॒होभि॑रि॒त्यहः-भिः॑ ।
च॒रन्ति॑ । षड॒हा इति॑ षट् – अ॒हाः । भ॒वन्ति॑ । षट् । वै । ऋ॒तवः॑ ।

सँव॒थ्स॒र इति॑ सं – व॒थ्स॒रः । ऋ॒तुषु॑ । ए॒व । सँव॒थ्स॒र इति॑
सं-व॒थ्स॒रे । प्र॒तीति॑ । ति॒ष्ठन्ति॑ । गौः । च । आ॒युः । च । म॒द्ध्य॒तः ।
स्तो॒मौ । भ॒वतः॑ । सँव॒थ्स॒रस्येति॑ सं – व॒थ्स॒रस्य॑ । ए॒व । तत् ।

मि॒थु॒नम् । म॒द्ध्य॒तः । 4 (50)

TS 7.5.1.5

द॒धति॑ प्र॒जन॑नाय॒ ज्योति॑र॒भितो॑ भ॒वति॑ वि॒मोच॑नमे॒व तच्छ॑न्दा॒स्ये॒व
तद्-वि॒मो॒कं य॑न्त्यथो॒ उ॒भय॑तो॒ ज्योति॑षै॒व ष॑ड॒हेन॑ सु॒वर्गं॑ लो॒कं य॑न्ति
ब्र॒ह्म॒वादि॑नो॒ वद॑न्त्या॒सते॒ केन॑ य॒न्तीति॑ दे॒वया॑नेन प॒थेति॑ ब्रू॒याच्छ॑न्दा॒सि
वै दे॒वया॑नः प॒न्था गाय॑त्री त्रि॒ष्टुब्-ज॑गती॒ ज्योति॑र्वै गाय॑त्री
गौस्त्रि॒ष्टुगा॑युर्ज॒गती॒ यदे॒ते स्तो॒मा भ॑वन्ति दे॒वया॑ने॒नैव – [] 5

TS 7.5.1.5 - Padam

द॒धति॑ । प्र॒जन॑नायेति॑ प्र – जन॑नाय । ज्योतिः॑ । अ॒भितः॑ । भ॒वति॑ ।
वि॒मोच॑नमिति॑ वि – मो॒चन॑म् । ए॒व । तत् । छ॒न्दा॒सि । ए॒व ।
तत् । वि॒मो॒कमिति॑ वि – मो॒कम् । य॒न्ति । अथो॒ इति॑ ।
उ॒भय॑तो॒ ज्योति॑षेत्यु॒भय॑तः-ज्योति॑षा । ए॒व । ष॑ड॒हेनेति॑ षट्-अ॒हेन॑ ।

सु॒व॒र्गमि॑ति सु॒वः – ग॒म् । लो॒कम् । य॒न्ति । ब्र॒ह्म॒वादि॑न इति
ब्र॒ह्म – वा॒दिनः॑ । व॒दन्ति॑ । आ॒स॒ते । के॒न । य॒न्ति । इति॑ ।
दे॒व॒या॒ने॒नेति॑ दे॒व – या॒ने॒न । प॒था । इति॑ । ब्रू॒यात् । छ॒न्दा॒सि॑ । वै ।
दे॒व॒या॒न इति॑ दे॒व – या॒नः॑ । प॒न्थाः॑ । गा॒य॒त्री । त्रि॒ष्टुप् । ज॒गती॑ ।
ज्यो॒तिः । वै । गा॒य॒त्री । गौः । त्रि॒ष्टुक् । आ॒युः । ज॒गती॑ । यत् ।
ए॒ते । स्तो॒माः॑ । भ॒वन्ति॑ । दे॒व॒या॒ने॒नेति॑ दे॒व-या॒ने॒न । ए॒व । 5 (50)

TS 7.5.1.6

तत् प॒था य॒न्ति स॒मा॒न॒ञ् साम॑ भ॒वति॑ दे॒वलो॒को वै सा॒म दे॒वलो॒कादे॒व
न॒य॒न्त्य॒न्याअ॒न्या ऋ॒चो भ॒वन्ति॑ म॒नुष्य॒लो॒को वा ऋ॒चो
म॒नुष्य॒लो॒कादे॒वान्य॑म॒न्यं दे॒वलो॒कम॒भ्या॒रोह॑न्तो य॒न्त्य॒भि॒व॒र्तो ब्र॒ह्म॒सा॒मं
भ॒वति॑ सु॒व॒र्गस्य॑ लो॒कस्या॒भि॒वृ॒त्या अ॒भि॒जिद्-भ॒वति॑ सु॒व॒र्गस्य॑
लो॒कस्या॒भि॒जित्यै॑ वि॒श्वजिद्-भ॒वति॑ वि॒श्वस्य॑ जि॒त्यै मा॒सिमा॑सि
पृ॒ष्ठान्यु॑प य॒न्ति मा॒सिमा॑स्यति॒ग्राह्या॑ गृह्य॒न्ते मा॒सिमा॑स्ये॒व
वी॒र्यं () द॒धति॑ मा॒सां प्र॒ति॒ष्ठित्या॑ उ॒परि॑ष्ठान्मा॒सां पृ॒ष्ठान्यु॑प य॒न्ति
तस्मा॑दु॒परि॑ष्ठा॒दोष॑ध॒यः फ॒लं गृह्ण॑न्ति ॥ 6

TS 7.5.1.6 - Padam

तत् । प॒था । य॒न्ति । स॒मा॒नम् । सा॒म । भ॒व॒ति । दे॒व॒लो॒क इति॑
दे॒व – लो॒कः । वै । सा॒म । दे॒व॒लो॒का॒दि॒ति दे॒व – लो॒कात् ।
ए॒व । न । य॒न्ति । अ॒न्याअ॒न्या इत्य॒न्याः – अ॒न्याः । ऋ॒चः ।
भ॒व॒न्ति । म॒नु॒ष्य॒लो॒क इति॑ म॒नु॒ष्य – लो॒कः । वै । ऋ॒चः ।
म॒नु॒ष्य॒लो॒का॒दि॒ति म॒नु॒ष्य – लो॒कात् । ए॒व ।
अ॒न्यम॒न्यमि॒त्यन्य॑म् – अ॒न्यम् । दे॒व॒लो॒कमि॒ति दे॒व – लो॒कम् ।
अ॒भ्या॒रो॒ह॒न्त इत्य॑भि-आ॒रो॒ह॒न्तः । य॒न्ति । अ॒भि॒व॒र्त इत्य॑भि – व॒र्तः ।
ब्र॒ह्म॒सा॒ममि॒ति ब्र॒ह्म – सा॒मम् । भ॒व॒ति । सु॒व॒र्ग॒स्ये॒ति सु॒वः – ग॒स्य ।
लो॒क॒स्य । अ॒भि॒वृ॒त्या इत्य॑भि – वृ॒त्यै । अ॒भि॒जि॒दि॒त्यभि – जि॒त् ।
भ॒व॒ति । सु॒व॒र्ग॒स्ये॒ति सु॒वः – ग॒स्य । लो॒क॒स्य । अ॒भि॒जि॒त्या
इत्य॑भि – जि॒त्यै । वि॒श्व॒जि॒दि॒ति वि॒श्व – जि॒त् । भ॒व॒ति । वि॒श्व॒स्य ।
जि॒त्यै॑ । मा॒सि॒मा॒सी॒ति मा॒सि – मा॒सि । पृ॒ष्ठानि॑ । उ॒पे॒ति । य॒न्ति ।
मा॒सि॒मा॒सी॒ति मा॒सि – मा॒सि । अ॒ति॒ग्रा॒ह्या इत्य॑ति – ग्रा॒ह्याः ।
गृ॒ह्य॒न्ते । मा॒सि॒मा॒सी॒ति मा॒सि – मा॒सि । ए॒व । वी॒र्य॑म् () । द॒ध॒ति ।

मा॒साम् । प्र॒ति॒ष्ठि॒त्या इति॑ प्र॒ति – स्थि॒त्यै । उ॒परि॑ष्ठात् । मा॒साम् ।
पृ॒ष्ठानि॑ । उ॒पेति॑ । य॒न्ति । तस्मा॑त् । उ॒परि॑ष्ठात् । ओष॑धयः । फ॒लम् ।
गृ॒ह्णन्ति॑ ॥ 6 (63) (गो॒स॒त्रं वा॑ – ए॒ति सँव॑त्स॒रौ – ऽर्द्ध॑मा॒सा –
मि॒थुनं॑ म॒द्ध्यतो॑ – दे॒व॒या॒न॒नैव॑ – वी॒र्यं॑ – त्रयो॑दश च) (A1)

TS 7.5.2.1

गा॒वो वा ए॒तत् स॒त्रमा॑सताशृ॒ङ्गाः स॒तीः शृ॒ङ्गाणि॑ सि॒षास॑न्तीस्ता॒सां
दश॑ मा॒सा नि॑षण्णा आसन्नथ शृ॒ङ्गाण्य॑जायन्त ता अ॒ब्रुव॑न्नराथ्स्मोत्
ति॒ष्ठामा॑व तं का॒मम॑रुथ्स्महि येन॒ कामे॑न न्यष॒दामे॑ति ता॒सामु॑ त्वा
अ॒ब्रुव॑न्नर्धा॒वा या॑वतीर्वाऽऽसा॒महा ए॒वेमौ॑द्वादशौ मा॒सौ सँव॑त्स॒रः
सं॒पाद्यो॑त् ति॒ष्ठामे॑ति ता॒सां – [] 7

TS 7.5.2.1 - Padam

गा॒वः । वै । ए॒तत् । स॒त्रम् । आ॒स॒त । अ॒शृ॒ङ्गाः । स॒तीः । शृ॒ङ्गाणि॑ ।
सि॒षास॑न्तीः । ता॒साम् । दश॑ । मा॒साः । नि॑षण्णा इति॑ नि – स॒न्नाः ।
आ॒स॒न् । अथ॑ । शृ॒ङ्गाणि॑ । अ॒जा॒य॒न्त । ताः । अ॒ब्रुव॑न् । अ॒राथ्स्म॑ ।
उ॒दि॒ति । ति॒ष्ठाम॑ । अ॒वे॒ति । तम् । का॒मम् । अ॒रुथ्स्म॑हि । येन॑ ।

कामे॑न । न्य॑ष॒दामे॑ति॒ नि – अस॑दाम । इति॑ । ता॒साम् । उ॒ । तु॒ । वै ।
अ॒ब्रुव॑न् । अ॒र्धाः । वा । याव॑तीः । वा । आ॒साम॑है । ए॒व । इ॒मौ ।
द्वाद॑शौ । मा॒सौ । सँ॑व॒त्सर॑मिति॒ सं – व॒त्सर॑म् । संपा॑द्येति॒
सं – पा॑द्य । उ॒दिति॑ । ति॒ष्ठाम॑ । इति॑ । ता॒साम् । 7 (50)

TS 7.5.2.2

द्वाद॑शे मा॒सि शृ॑ङ्गाणि प्राव॑र्तन्त श्र॒द्धया॒ वाऽश्र॑द्धया॒ वा ता
इ॒मा या॑स्तू॒परा॒ उ॒भय्यो॒ वाव॑ ता आ॒र्ध्व॑न्वन् । याश्च॑ शृ॑ङ्गाण्यस॑न्वन् ।
याश्चो॑र्ज॒मवा॑रुन्ध॒तर्ध्नो॑ति द॒शसु॑ मा॒सू॒त्तिष्ठ॑न्त॒र्ध्नो॑ति द्वाद॑शसु
य ए॒वं वै॑द॒ पदे॑न॒ खलु॑ वा ए॒ते य॑न्ति वि॒न्दति॒ खलु॑ वै प॒देन॒ यन्
तद्वा ए॒तदृ॑द्धम॒यनं॑ तस्मा॑ () दे॒तद्-गो॑सनि॑ ॥ 8

TS 7.5.2.2 - Padam

द्वाद॑शे । मा॒सि । शृ॑ङ्गाणि । प्रेति॑ । अ॒वर्त॑न्त । श्र॒द्धये॑ति श्र॒त्-ध्या॑ ।
वा । अ॒श्रद्ध॑येत्य॒श्रत् – ध्या॑ । वा । ताः । इ॒माः । याः । तू॒पराः ।
उ॒भय्यः॑ । वाव॑ । ताः । आ॒र्ध्व॑न्वन् । याः । च॒ । शृ॑ङ्गाणि ।
अस॑न्वन् । याः । च॒ । ऊ॒र्जम्॑ । अ॒वा॒रुन्ध॑तेत्य॒व – अ॒रुन्ध॑त ।

ऋ॒द्ध॒नो॒ति॒ । द॒श॒स्वि॒ति॒ द॒श – सु॒ । मा॒सु॒ । उ॒त्ति॒ष्ठ॒न्नि॒त्यु॒त्-ति॒ष्ठ॒न् ।
ऋ॒द्ध॒नो॒ति॒ । द्वा॒द॒श॒स्वि॒ति॒ द्वा॒द॒श – सु॒ । यः॒ । ए॒वम् । वे॒द । प॒दे॒न॒ ।
ख॒लु॒ । वै । ए॒ते । य॒न्ति॒ । वि॒न्द॒ति॒ । ख॒लु॒ । वै । प॒दे॒न॒ । य॒न् । तत् ।
वै । ए॒तत् । ऋ॒द्धम् । अ॒य॒नम् । तस्मा॑त् () । ए॒तत् ।
गो॒स॒नी॒ति॒ गो – स॒नि॒ ॥ 8 (52)

(ति॒ष्ठामे॒ति ता॒सां – तस्मा॑द् – द्वे च॑) (A2)

TS 7.5.3.1

प्र॒थ॒मे मा॒सि पृ॒ष्ठान्यु॑प॒ यन्ति॑ म॒द्ध्य॒म उप॑ य॒न्त्यु॒त्त॒म उप॑ य॒न्ति॒
तदा॑हु॒र्याँ वै त्रि॑रे॒कस्या॑ह॒ उप॒सी॒दन्ति॑ द॒हं वै साऽप॑रा॒भ्यां
दोहा॑भ्यां दु॒हेऽथ॒ कुतः॑ सा धौ॒क्ष्य॒ते यां द्वा॒द॒श कृ॒त्व उप॒सी॒दन्ती॑ति॒
सँव॑त्स॒रꣳ सं॒पाद्यो॑त्त॒मे मा॒सि स॒कृत् पृ॒ष्ठान्यु॑पे॒युस्तद्-य॑ज॒माना
य॒ज्ञं प॒शू॒नव॑ रु॒न्ध॒ते स॒मु॒द्रं वा – [] 9

TS 7.5.3.1 - Padam

प्र॒थ॒मे । मा॒सि । पृ॒ष्ठानि॑ । उपे॒ति॒ । य॒न्ति॒ । म॒द्ध्य॒मे । उपे॒ति॒ । य॒न्ति॒ ।
उ॒त्त॒म इ॒त्यु॒त् – त॒मे । उपे॒ति॒ । य॒न्ति॒ । तत् । आ॒हुः । या॒म् । वै ।

त्रिः । एकस्य । अहः । उपसीदन्तीत्युप – सीदन्ति । दहम् । वै ।
सा । अपराभ्याम् । दोहाभ्याम् । दुहे । अथ । कुतः । सा ।
धोक्ष्यते । याम् । द्वादश । कृत्वः । उपसीदन्तीत्युप – सीदन्ति ।
इति । सँवथ्सरमिति सं – वथ्सरम् । संपाद्येति सं – पाद्य ।
उत्तम इत्युत् – तमे । मासि । सकृत् । पृष्ठानि । उपेति । इयुः ।
तत् । यजमानाः । यज्ञम् । पशून् । अवेति । रुन्धते । समुद्रम् ।

वै । 9 (50)

TS 7.5.3.2

एतेनवारमपारं प्र प्लवन्ते ये सँवथ्सरमुपयन्ति यद् बृहद्-रथन्तरे
अन्वर्जयुर्यथा मध्ये समुद्रस्य प्लवमन्वर्जयुस्तादृक् तदनुत्सर्गं
बृहद्-रथन्तराभ्यामित्वा प्रतिष्ठां गच्छन्ति सर्वेभ्यो वै कामेभ्यः
सन्धिर्दुहे तद्-यजमानाः सर्वान् कामानव रुन्धते ॥ 10

TS 7.5.3.2 - Padam

ए॒ते । अ॒न॒वा॒रम् । अ॒पा॒रम् । प्रे॒ति॑ । प्ल॒व॒न्ते॑ । ये । सँ॒व॒थ्स॒रमि॑ति॒
सं – व॒थ्स॒रम् । उ॒प॒य॒न्ती॑त्यु॒प – य॒न्ति॑ । यत् । बृ॒ह॒द्र॒थ॒न्त॒रे इति॑
बृ॒हत् – र॒थ॒न्त॒रे । अ॒न्व॒र्जे॑यु॒रित्य॑नु – अ॒र्जे॑युः । य॒था॑ । म॒द्ध्ये॑ ।
स॒मु॒द्र॒स्य॑ । प्ल॒व॒म् । अ॒न्व॒र्जे॑यु॒रित्य॑नु – अ॒र्जे॑युः । ता॒दृक् । तत् ।
अ॒नु॒त्स॒र्गमि॑त्यनुत् – स॒र्गम् । बृ॒ह॒द्र॒थ॒न्त॒राभ्या॑मि॒ति॒
बृ॒हत् – र॒थ॒न्त॒राभ्या॑म् । इ॒त्वा । प्र॒ति॒ष्ठा॒मि॒ति॒ प्र॒ति – स्था॑म् ।
ग॒च्छ॒न्ति॑ । स॒र्वे॑भ्यः । वै । का॒मे॑भ्यः । स॒न्धि॒रि॒ति॒ सं – धिः॑ । दु॒हे॑ ।
तत् । य॒ज॒मा॒नाः । स॒र्वान्॑ । का॒मान्॑ । अ॒वे॒ति॑ । रु॒न्ध॒ते ॥ 10 (34)

(स॒मु॒द्रं॑ वै – च॒तु॑स्त्रि॒ंशच्च॑) (A3)

TS 7.5.4.1

स॒मा॒न्य॑ ऋ॒चो॑ भ॒वन्ति॑ म॒नु॒ष्य॒लो॒को वा॑ ऋ॒चो॑ म॒नु॒ष्य॒लो॒कादे॒व न
य॒न्त्य॒न्यद॒न्यथ्॑ सा॒म भ॒वति॑ दे॒व॒लो॒को वै सा॒म दे॒व॒लो॒कादे॒वान्य॑म॒न्यं
म॒नु॒ष्य॒लो॒कं प्र॒त्य॒व॒रो॒ह॒न्तो॑ य॒न्ति॑ ज॒ग॒ती॒म॒ग्र उ॒प य॒न्ति॑ ज॒ग॒तीं॑ वै
छ॒न्दा॑सि प्र॒त्य॒व॒रो॒ह॒न्त्या–ग्र॒य॒णं॑ ग॒र्हा बृ॒हत् पृ॒ष्ठानि॑ त्रयस्त्रि॒ंशञ्

स्तो॒मा-स्तस्मा॒-ज्या॒या॒ꣳसं॑ कनी॒यान् प्रत्य॑वरो॒हति॑ वैश्व॒कर्म॑णो
गृह्य॑ते॒विश्वा॑न्ये॒व तेन॑ कर्मा॒णि यज॑माना॒ अव॑ रुन्धत

आदित्यो- [] 11

TS 7.5.4.1 - Padam

स॒मा॒न्यः । ऋ॒चः । भ॒वन्ति॑ । म॒नुष्य॑लो॒क इति॑ म॒नुष्य॑ - लो॒कः ।
वै । ऋ॒चः । म॒नुष्य॑लो॒कादि॑ति म॒नुष्य॑ - लो॒कात् । ए॒व । न । य॒न्ति ।
अ॒न्यद॑न्यदि॒त्यन्य॑त् - अ॒न्यत् । सा॒म । भ॒वति॑ । दे॒वलो॒क इति॑
दे॒व - लो॒कः । वै । सा॒म । दे॒वलो॒कादि॑ति दे॒व - लो॒कात् । ए॒व ।
अ॒न्यम॑न्यमि॒त्यन्यं॑ - अ॒न्यम् । म॒नुष्य॑लो॒कमि॑ति म॒नुष्य॑ - लो॒कम् ।
प्र॒त्यव॑रोह॒न्त इति॑ प्र॒ति - अ॒वरो॑ह॒न्तः । य॒न्ति । ज॒गती॑म् । अ॒ग्रे ।
उ॒पेति॑ । य॒न्ति । ज॒गती॑म् । वै । छ॒न्दाꣳसि॑ । प्र॒त्यव॑रोह॒न्तीति॑
प्र॒ति - अ॒वरो॑ह॒न्ति । आ॒ग्र॒यण॑म् । ग्र॒हाः । बृ॒हत् । पृ॒ष्ठानि॑ ।
त्र॒यस्त्रि॑ꣳशमि॑ति त्र॒यः - त्रि॑ꣳशम् । स्तो॒माः । तस्मा॑त् ।
ज्या॒याꣳसम् । कनी॒यान् । प्र॒त्यव॑रोह॒तीति॑ प्र॒ति - अ॒वरो॑हति ।

वै॒श्व॒क॒र्म॒ण॒ इति॑ वै॒श्व – क॒र्म॒णः॑ । गृ॒ह्य॒ते॑ । वि॒श्व॒ानि॑ । ए॒व । ते॒न ।
क॒र्मा॒णि । यज॑मा॒नाः । अ॒वेति॑ । रु॒न्ध॒ते॑ । आ॒दि॒त्यः॑ । 11 (50)

TS 7.5.4.2

गृ॒ह्य॒त इ॒यं वा॑ अ॒दि॒तिर॒स्यामे॒व प्र॒ति ति॒ष्ठन्त्य॑न्यो॒ऽन्यो गृ॒ह्येते॑
मि॒थु॒न॒त्वाय॑ प्र॒जा॒त्या अ॒वा॒न्तरं॑ वै द॒श॒रा॒त्रेण॑ प्र॒जाप॑तिः प्र॒जा अ॒सृज॑त
यद्-द॒श॒रा॒त्रो भ॑वति प्र॒जा ए॒व तद्-यज॑मा॒नाः सृज॑न्त ए॒ता ह॒ वा
उ॒द॒ङ्कः॑ शौ॒ल्बा॒यनः॑ स॒त्रस्य॑र्द्धिमु॒वाच॑ यद्-द॒श॒रा॒त्रो यद्-द॒श॒रा॒त्रो
भ॑वति स॒त्रस्य॑र्द्ध्या अथो यदे॒व पूर्वे॑ष्वह॒स्सु वि॒लोम॑ क्रि॒यते॑
तस्यै॒वै ()-षा॑ शान्तिः॑ ॥ 12

TS 7.5.4.2 - Padam

गृ॒ह्य॒ते । इ॒यम् । वै । अ॒दि॒तिः । अ॒स्याम् । ए॒व । प्र॒तीति॑ । ति॒ष्ठन्ति॑ ।
अ॒न्यो॒न्य इ॒त्यन्यः॑ – अ॒न्यः । गृ॒ह्येते॑ इति॑ ।
मि॒थु॒न॒त्वायेति॑ मि॒थु॒न – त्वा॒य । प्र॒जा॒त्या इति॑ प्र – जा॒त्यै ।
अ॒वा॒न्तर॑मित्य॒व – अ॒न्तर॑म् । वै । द॒श॒रा॒त्रेणेति॑ द॒श – रा॒त्रेण॑ ।
प्र॒जाप॑तिरिति॑ प्र॒जा – प॒तिः । प्र॒जा इति॑ प्र – जाः । अ॒सृज॑त ।

यत् । द॒श॒रा॒त्र इति॑ द॒श – रा॒त्रः । भ॒वति॑ । प्र॒जा इति॑ प्र – जाः ।
ए॒व । तत् । यज॑मा॒नाः । सृ॒ज॒न्ते । ए॒ताम् । ह॒ । वै । उ॒द॒ङ्कः ।
शौ॒ल्बा॒यनः॑ । स॒त्रस्य॑ । ऋ॒द्धि॑म् । उ॒वाच॑ । यत् ।
द॒श॒रा॒त्र इति॑ द॒श – रा॒त्रः । यत् । द॒श॒रा॒त्र इति॑
द॒श – रा॒त्रः । भ॒वति॑ । स॒त्रस्य॑ । ऋ॒द्ध्यै॑ । अथो॒ इति॑ । यत् ।
ए॒व । पूर्वे॑षु । अ॒ह॒स्वि॒त्यहः॑ – सु॒ । वि॒लो॒मेति॑ वि – लो॒म ।
क्रि॒यते॑ । तस्य॑ । ए॒व () । ए॒षा । शान्तिः॑ ॥ 12 (52)

(आ॒दि॒त्य – स्तस्यै॑व – द्वे च॑) (A4)

TS 7.5.5.1

यदि॑ सोमौ स॒सु॒तौ स्यातां॑ म॒हति॑ रा॒त्रियै॑ प्रा॒तरनु॒वाक॑-मु॒पाकु॑र्यात्
पूर्वो॑ वाचं॒ पूर्वो॑ दे॒वताः॑ पूर्वः॒ छन्दा॑सि वृ॒द्धे वृष॑ण्वतीं प्रति॒पदं॑
कुर्यात् प्रा॒तस्स॒वना॑दे॒वैषा॒मिन्द्रं॑ वृ॒द्धे ऽथो॒ खल्वा॑हुः स॒वनमु॒खे-
स॒वनमु॒खे का॒र्येति॑ स॒वनमु॒खाथ् स॒वनमु॒खा-दे॒वैषा॒मिन्द्रं॑
वृ॒द्धे सँ॒वेशा॑योप॒वेशाय॑ गा॒यत्रि॒यास्त्रि॒ष्टुभो॑ जग॒त्या अनु॒ष्टुभः॑

पङ्क्त्या॑ अ॒भिभू॑त्यै॒ स्वाहा॑ छन्दा॑सि॒ वै सँ॑वेश॒ उप॑वेशः

छन्दा॑भिरे॒वैषां॑ – [] 13

TS 7.5.5.1 - Padam

यदि॑ । सोमौ॑ । सँ॑सुता॒विति॑ सं – सु॒तौ । स्या॑ताम् । म॒हति॑ ।

रा॒त्रियै॑ । प्रा॒तर॒नुवा॑कमि॒ति प्रा॑तः – अ॒नुवा॑कम् ।

उपा॑कुर्या॒दित्यु॑प – आ॑कुर्यात् । पूर्॒वः । वाच॑म् । पूर्॒वः । दे॒वताः॑ ।

पूर्॒वः । छन्दा॑सि । वृ॒द्धे । वृष॑ण्वतीमि॒ति वृष॑ण् – व॒तीम् ।

प्रति॑पदमि॒ति प्रति॑ – प॒दम् । कुर्या॑त् । प्रा॒तस्स॒वना॑दि॒ति

प्रा॑तः–स॒वना॑त् । ए॒व । ए॒षाम् । इन्द्र॑म् । वृ॒द्धे । अथो॑ इति॑ । ख॒लु ।

आ॒हुः । स॒वन॒मुखे॑स॒वन॒मुख॑ इति॑ स॒वन॒मुखे॑ – स॒वन॒मुखे॑ । का॒र्या ।

इति॑ । स॒वन॒मुखा॑त्स॒वन॒मुखा॑दि॒ति स॒वन॒मुखा॑त् – स॒वन॒मुखा॑त् ।

ए॒व । ए॒षाम् । इन्द्र॑म् । वृ॒द्धे । सँ॑वेशायेति॑ सं – वे॒शाय॑ ।

उप॑वेशायेत्यु॒प – वे॒शाय॑ । गा॒य॒त्रियाः॑ । त्रि॒ष्टुभः॑ । जग॑त्याः । अ॒नुष्टु॒भ

इत्य॑नु – स्तु॒भः । पङ्क्त्याः॑ । अ॒भिभू॑त्या इत्य॒भि – भू॒त्यै ।

स्वाहा॑ । छन्दा॑सि । वै । सँ॑वेश इति॑ सं – वे॒शः ।

उ॒प॒वे॒श इत्यु॑प – वे॒शः । छ॒न्दा॑भि॒रिति॑ छ॒न्दः – भिः॑ ।

ए॒व । ए॒षाम् । 13 (50)

TS 7.5.5.2

छ॒न्दा॑सि॒ वृ॒द्धे स॒जनी॑य॒ शस्यं॑ वि॒हव्य॑ अ॒गस्त्य॑स्य
क॒याशु॑भी॒य शस्य॑मे॒ताव॒द्वा अ॒स्ति या॒वदे॒तद्-या॒वदे॒वास्ति॑ तदे॒षां
वृ॒द्धे यदि॑ प्रा॒तस्स॒वने क॒लशो॑ दी॒र्येत॑ वैष्ण॒वीषु॑ शि॒पिवि॒ष्टव॑तीषु
स्तु॒वीरन्॒यद्वै य॒ज्ञस्या॑-ति॒रिच्य॑ते वि॒ष्णुं तच्छि॑पि॒विष्टम॑भ्यति॒ रिच्य॑ते
तद्वि॒ष्णुः शि॒पिवि॒ष्टोऽति॑रिक्त ए॒वाति॑रिक्तं दधा॒त्यथो अति॑रिक्ते॒नैवा-
ति॑रिक्तमा॒प्त्वाऽव॑ () रु॒न्धते॒ यदि म॒द्ध्यन्दि॑ने दी॒र्येत॑ वषट्का॒रनि॑धन॒
सा॒म कुर्यु॑र्वषट्का॒रो वै य॒ज्ञस्य॑ प्र॒तिष्ठा॑ प्र॒तिष्ठा॑मे॒वैनद्-ग॑मयन्ति॒ यदि
तृ॒तीय॑स॒वन ए॒तदे॒व ॥ 14

TS 7.5.5.2 - Padam

छ॒न्दा॑सि॒ वृ॒द्धे । स॒जनी॑यमि॒ति स – ज॒नीय॑म् । शस्य॑म् ।
वि॒हव्य॑मि॒ति वि – ह॒व्यम् । शस्य॑म् । अ॒गस्त्य॑स्य । क॒याशु॑भी॒यमि॒ति
क॒या-शु॑भी॒यम् । शस्य॑म् । ए॒ताव॑त् । वै । अ॒स्ति । या॒वत् । ए॒तत् ।

यावत् । ए॒व । अ॒स्ति॑ । तत् । ए॒षाम् । वृ॒द्धे । य॒दि ।
 प्रा॒त॒स्स॒व॒न इति॑ प्रा॒तः – स॒व॒ने । क॒ल॒शः । दी॒र्ये॑त । वै॒ष्ण॒वीषु॑ ।
 शि॒पि॒वि॒ष्ट॒व॒तीष्वि॑ति शि॒पि॒वि॒ष्ट – व॒तीषु॑ । स्तु॒वी॒र॒न् । यत् । वै ।
 य॒ज्ञ॒स्य॑ । अ॒ति॒रि॒च्य॒त इत्य॑ति – रि॒च्य॒ते । वि॒ष्णु॑म् । तत् ।
 शि॒पि॒वि॒ष्ट॒मि॒ति शि॒पि – वि॒ष्टम् । अ॒भि । अ॒ती॒ति । रि॒च्य॒ते ।
 तत् । वि॒ष्णुः । शि॒पि॒वि॒ष्ट इति॑ शि॒पि – वि॒ष्टः । अ॒ति॒रि॒क्त॒
 इत्य॑ति – रि॒क्ते॑ । ए॒व । अ॒ति॒रि॒क्त॒मि॒त्य॒ति – रि॒क्तम् । द॒धा॒ति । अ॒थो
 इति॑ । अ॒ति॒रि॒क्ते॒ने॒त्य॒ति – रि॒क्ते॒न । ए॒व । अ॒ति॒रि॒क्त॒मि॒त्य॒ति – रि॒क्तम् ।
 आ॒प्त्वा । अ॒वे॒ति () । रु॒न्ध॒ते । य॒दि । म॒द्ध्य॒न्दि॒ने । दी॒र्ये॑त ।
 व॒षट्का॒र॒नि॒ध॒न॒मि॒ति व॒षट्का॒र – नि॒ध॒न॒म् । सा॒म । कु॒र्युः । व॒षट्का॒र
 इति॑ व॒षट् – का॒रः । वै । य॒ज्ञ॒स्य॑ । प्र॒ति॒ष्ठेति॑ प्र॒ति – स्था॑ ।
 प्र॒ति॒ष्ठा॒मि॒ति प्र॒ति – स्था॑म् । ए॒व । ए॒न॒त् । ग॒म॒य॒न्ति॑ । य॒दि ।
 तृ॒ती॒य॒स॒व॒न इति॑ तृ॒ती॒य – स॒व॒ने । ए॒त॒त् । ए॒व ॥ 14 (69)
 (छ॒न्दो॑भि॒रे॒वैषा॑ – म॒वै – का॒न्न॒वि॒श॒तिश्च॑) (A5)

TS 7.5.6.1

षड॒हैर्मा॑सान्त् स॒ंपाद्या॑ह॒रुथ् सृ॑जन्ति षड॒हैर्हि॑ मा॑सान्त् स॒ंपश्य॑न्त्य-
र्द्धमा॑सैर्मा॑सान्त् स॒ंपाद्या॑ह॒रुथ् सृ॑जन्त्य-र्द्धमा॑सैर्हि॑ मा॑सान्त्
स॒ंपश्य॑न्त्यमा॒वास्य॑या मा॑सान्त् स॒ंपाद्या॑ह॒रुथ् सृ॑जन्त्यमा॒वास्य॑या हि
मा॑सान्त् स॒ंपश्य॑न्ति पौ॒र्णमा॑स्या मा॑सान्त् स॒ंपाद्या॑ह॒रुथ् सृ॑जन्ति
पौ॒र्णमा॑स्या हि मा॑सान्त् स॒ंपश्य॑न्ति यो वै पू॒र्ण आ॑सिञ्चति॒ परा॑ स
सिञ्चति॒ यः पू॒र्णादु॑दचति - [] 15

TS 7.5.6.1 - Padam

षड॒हैरि॑ति षट् - अ॒हैः । मा॑सान् । स॒ंपाद्ये॑ति सं - पाद्य॑ । अ॒हः ।
उदि॑ति । सृ॒जन्ति॑ । षड॒हैरि॑ति षट् - अ॒हैः । हि॑ । मा॑सान् ।
स॒ंपश्य॑न्तीति सं - पश्य॑न्ति । अ॒र्द्धमा॑सैरि॒त्यर्द्ध॑ - मा॑सैः ।
मा॑सान् । स॒ंपाद्ये॑ति सं - पाद्य॑ । अ॒हः । उदि॑ति । सृ॒जन्ति॑ ।
अ॒र्द्धमा॑सैरि॒त्यर्द्ध॑ - मा॑सैः । हि॑ । मा॑सान् । स॒ंपश्य॑न्तीति
सं - पश्य॑न्ति । अ॒मावा॑स्ययेत्य॒मा - वा॑स्यया । मा॑सान् ।
स॒ंपाद्ये॑ति सं - पाद्य॑ । अ॒हः । उदि॑ति । सृ॒जन्ति॑ ।

अ॒मा॒वा॒स्य॑ये॒त्य॑मा – वा॒स्य॑या । हि । मा॒सान् ।
सं॒पश्य॑न्तीति सं-पश्य॑न्ति । पौ॒र्ण॒मा॒स्ये॑ति पौ॒र्ण॒मा॒स्या । मा॒सान् ।
सं॒पाद्ये॑ति सं – पाद्य॑ । अ॒हः । उ॒दि॒ति । सृ॒ज॒न्ति ।
पौ॒र्ण॒मा॒स्ये॑ति पौ॒र्ण – मा॒स्या । हि । मा॒सान् । सं॒पश्य॑न्तीति
सं – पश्य॑न्ति । यः । वै । पू॒र्णे । आ॒सिञ्च॑तीत्या – सिञ्च॑ति ।
परे॑ति । सः । सिञ्च॑ति । यः । पू॒र्णात् ।

उ॒द॒च॒तीत्यु॑त् – अ॒च॒ति । 15 (50)

TS 7.5.6.2

प्रा॒णम॑स्मिन्थ्स द॒धा॒ति यत् पौ॒र्ण॒मा॒स्या मा॒सान्थ् सं॒पाद्या॑हरुथ् सृ॒ज॒न्ति
सँव॑थ्सरायैव तत् प्रा॒णं द॒ध॒ति तद॑नु स॒त्रि॒णः प्रा॑णन्ति
यद॒ह॒र्नो॑थ्-सृ॒जे॒यु॒र्यथा॑ दृ॒तिरु॑प॒नद्धो॑ वि॒प॒त॒त्ये॒वꣳ सँव॑थ्सरो
वि प॒ते॒दा॒र्ति-मा॒च्छे॑यु॒र्यत् पौ॒र्ण॒मा॒स्या मा॒सान्थ्-सं॒पाद्या॑हरुथ् सृ॒ज॒न्ति
सँव॑थ्सरायैव तदु॒दा॒नं द॒ध॒ति तद॑नु स॒त्रि॒ण उ – [] 16

TS 7.5.6.2 - Padam

प्रा॒णमि॑ति॒ प्र – अ॒नम् । अ॒स्मिन् । सः । द॒धा॒ति॒ । यत् ।
पौ॒र्ण॒मा॒स्ये॑ति॒ पौ॒र्ण – मा॒स्या । मा॒सान् । सं॒पा॒द्ये॑ति॒ सं – पा॒द्य ।
अ॒हः । उ॒थ्सृ॒जन्ती॑त्युत् – सृ॒जन्ति॑ । सँ॒व॒थ्स॒रा॒ये॑ति॒ सं – व॒थ्स॒रा॒य ।
ए॒व । तत् । प्रा॒णमि॑ति॒ प्र – अ॒नम् । द॒ध॒ति॒ । तत् । अ॒न्वि॑ति॒ ।
स॒न्नि॒णः । प्रे॒ति॒ । अ॒नन्ति॑ । यत् । अ॒हः । न ।
उ॒थ्सृ॒जे॒युरि॑त्युत् – सृ॒जे॒युः । यथा॑ । दृ॒तिः । उ॒प॒न॒द्ध इ॑त्युप – न॒द्धः ।
वि॒प॒त॒ती॑ति॒ वि – प॒त॒ति॒ । ए॒वम् । सँ॒व॒थ्स॒र इ॑ति॒ सं – व॒थ्स॒रः ।
वी॑ति॒ । प॒ते॒त् । आ॒र्ति॑म् । ए॒ति॒ । ऋ॒च्छे॒युः । यत् । पौ॒र्ण॒मा॒स्ये॑ति॒
पौ॒र्ण – मा॒स्या । मा॒सान् । सं॒पा॒द्ये॑ति॒ सं – पा॒द्य । अ॒हः ।
उ॒थ्सृ॒जन्ती॑त्युत् – सृ॒जन्ति॑ । सँ॒व॒थ्स॒रा॒ये॑ति॒ सं – व॒थ्स॒रा॒य । ए॒व ।
तत् । उ॒दा॒नमि॑त्युत् – अ॒नम् । द॒ध॒ति॒ । तत् । अ॒न्वि॑ति॒ । स॒न्नि॒णः ।
उ॒दि॑ति॒ । 16 (50)

TS 7.5.6.3

द॒नन्ति॑ नाऽऽ*॒र्तिमा॑च्छन्ति॒ पूर्ण॑मा॒से वै दे॒वानां॑ सु॒तो यत् पौ॑र्णमा॒स्या
मा॒सान्-सं॑पा॒द्याह॑रुथ् सृ॒जन्ति॑ दे॒वाना॑मे॒व तद्-य॒ज्ञेन॑ य॒ज्ञं
प्र॒त्यव॑रोहन्ति॒ वि वा ए॒तद्-य॒ज्ञं छि॑न्दन्ति॒ यथ् ष॑ड॒हस॑न्त॒त
स॑न्त॒मथा॑ह॒रुथ् सृ॒जन्ति॑ प्रा॒जाप॑त्यं प॒शुमा॑ ल॒भन्ते॑ प्र॒जाप॑तिः सर्वा॑ दे॒वता॑
दे॒वता॑भिरे॒व य॒ज्ञं सं त॑न्वन्ति॒ यन्ति॒ वा ए॒ते स॑व॒नाद्ये॑ह-[] 17

TS 7.5.6.3 - Padam

अ॒नन्ति॑ । न । आ॒र्तिम् । ए॒ति । ऋ॒च्छन्ति॑ । पू॒र्णमा॑स इति॑
पू॒र्ण - मा॒से । वै । दे॒वाना॑म् । सु॒तः । यत् । पौ॑र्णमा॒स्येति॑
पौ॒र्ण - मा॒स्या । मा॒सान् । सं॑पा॒द्येति॑ सं - पा॒द्य । अ॒हः ।
उ॒थ्सृ॑जन्तीत्युत् - सृ॒जन्ति॑ । दे॒वाना॑म् । ए॒व । तत् । य॒ज्ञेन॑ । य॒ज्ञम् ।
प्र॒त्यव॑रोहन्तीति॑ प्र॒ति - अ॒वरो॑हन्ति । वी॒ति । वै । ए॒तत् । य॒ज्ञम् ।
छि॒न्दन्ति॑ । यत् । ष॑ड॒हस॑न्त॒तमि॑ति ष॑ड॒ह - स॑न्त॒तम् । स॑न्त॒म् ।
अथ॑ । अ॒हः । उ॒थ्सृ॑जन्तीत्युत् - सृ॒जन्ति॑ । प्रा॒जाप॑त्यमि॒ति
प्रा॒जा-प॑त्यम् । प॒शुम् । ए॒ति । ल॒भन्ते॑ । प्र॒जाप॑तिरि॒ति प्र॒जा-प॑तिः ।

सर्वाः॑ । दे॒वताः॑ । दे॒वताभिः॑ । ए॒व । य॒ज्ञम् । समि॑ति । त॒न्व॒न्ति ।
य॒न्ति । वै । ए॒ते । स॒व॒नात् । ये । अ॒हः । 17 (50)

TS 7.5.6.4

–रु॒थ् सृ॒ज॒न्ति॑ तु॒रीयं॑ ख॒लु वा ए॒त॒थ् स॒व॒नं॑ य॒थ् सां॑नाय्यं॑ य॒थ्
सां॑नाय्यं॑ भ॒व॒ति ते॒नै॒व स॒व॒ना॒न्न य॒न्ति॑ स॒मु॒प॒हू॒य भ॒क्ष॒य॒न्त्ये॒त॒थ्–
सौ॒म॒पी॒था ह्ये॒त॒र्हि य॒था॒य॒त॒नं॑ वा ए॒तेषां॑ स॒व॒न॒भा॒जो दे॒वता॑ ग॒च्छ॒न्ति॒
येऽह॑रु॒थ् सृ॒ज॒न्त्य॑नु॒स॒व॒नं पु॒रो॒डा॒शा॒न् नि॒र्व॒प॒न्ति॑ य॒था॒य॒त॒ना॒दे॒व
स॒व॒न॒भा॒जो दे॒वता॑ अ॒व रु॒न्ध॒ते ऽष्टा॑क॒पा॒लान् प्रा॒त॒स्स॒व॒न
एका॑द॒श॒क॒पा॒लान् मा॒द्ध्य॑न्दि॒ने स॒व॒ने द्वा॑द॒श॒क॒पा॒लाऽ–स्तृ॒तीय॑स॒व॒ने
छ॒न्दाऽस्ये॒वाऽऽ*प्त्वा () –ऽव रु॒न्ध॒ते वै॒श्व॒दे॒वं च॒रुं तृ॒तीय॑स॒व॒ने
नि॒र्व॒प॒न्ति॑ वै॒श्व॒दे॒वं वै तृ॒तीय॑स॒व॒नं ते॒नै॒व तृ॒तीय॑स॒व॒ना॒न्न य॒न्ति॑ ॥ 18

TS 7.5.6.4 - Padam

उ॒थ्सृ॒ज॒न्ती॑त्यु॒त् – सृ॒ज॒न्ति॑ । तु॒री॒यम् । ख॒लु । वै । ए॒त॒त् । स॒व॒नम् ।
य॒त् । सा॒न्ना॒य्य॒मि॒ति सां॑–ना॒य्यम् । य॒त् । सा॒न्ना॒य्य॒मि॒ति सां॑–ना॒य्यम् ।

भवति । तेन । ए॒व । स॒व॒नात् । न । य॒न्ति । स॒मु॒प॒हू॒येति॑
सं – उ॒प॒हू॒य । भ॒क्ष॒य॒न्ति । ए॒त॒थ्सो॒मपी॒था इत्ये॒तत् – सो॒मपी॒थाः ।
हि । ए॒त॒र्हि । य॒थाय॒तन॑मिति॑ यथा – आ॒य॒त॒नम् । वै । ए॒तेषा॑म् ।
स॒व॒न॒भाज॑ इति॑ स॒व॒न – भाजः॑ । दे॒वताः॑ । ग॒च्छ॒न्ति । ये । अ॒हः ।
उ॒थ्सृ॒ज॒न्तीत्यु॑त् – सृ॒ज॒न्ति । अ॒नु॒स॒व॒न॒मित्य॑नु – स॒व॒नम् ।
पु॒रो॒डा॒शान् । नि॒रि॒ति । व॒प॒न्ति । य॒थाय॒त॒नादि॑ति॑ यथा – आ॒य॒त॒नात् ।
ए॒व । स॒व॒न॒भाज॑ इति॑ स॒व॒न – भाजः॑ । दे॒वताः॑ । अ॒वेति॑ । रु॒न्ध॒ते ।
अ॒ष्टाक॑पा॒लानि॒त्य॒ष्टा – क॒पा॒लान् । प्रा॒त॒स्स॒व॒न इति॑ प्रा॒तः – स॒व॒ने ।
ए॒का॒द॒शक॑पा॒लानि॒त्ये॒का॒द॒श – क॒पा॒लान् । मा॒द्ध्य॑न्दि॒ने । स॒व॒ने ।
द्वा॒द॒शक॑पा॒लानि॒ति द्वा॒द॒श – क॒पा॒लान् । तृ॒तीय॑स॒व॒न इति॑
तृ॒तीय – स॒व॒ने । छ॒न्दा॑सि । ए॒व । आ॒प्त्वा () । अ॒वेति॑ । रु॒न्ध॒ते ।
वै॒श्व॒दे॒वमि॑ति॑ वै॒श्व॒दे॒वम् । च॒रुम् । तृ॒तीय॑स॒व॒न इति॑ तृ॒तीय॒स॒व॒ने ।
नि॒रि॒ति । व॒प॒न्ति । वै॒श्व॒दे॒वमि॑ति॑ वै॒श्व – दे॒वम् । वै ।
तृ॒तीय॑स॒व॒नमि॑ति॑ तृ॒तीय – स॒व॒नम् । तेन॑ । ए॒व ।

तृ॒ती॒य॒स॒व॒ना॒दि॒ति॒ तृ॒ती॒य॒ – स॒व॒ना॒त् । न । य॒न्ति॒ ॥ 18 (65)

(उ॒द॒च॒ – त्पु॒ – द्येऽह॑ – रा॒प्त्वा – प॒ञ्च॑द॒श॒ च) (A6)

TS 7.5.7.1

उ॒थ्सृ॒ज्यां(३)नो॒थ्सृ॒ज्या(३)मि॒ति॒ मी॒मा॒ञ्स॒न्ते॒ ब्र॒ह्म॒वा॒दि॒न॒–स्त॒द्वा॒हु॒रु॒थ्
सृ॒ज्य॒मे॒वे॒त्य॒–मा॒वा॒स्या॒यां च॒ पौ॒र्ण॒मा॒स्यां चो॒थ्–सृ॒ज्य॒मि॒त्या॒हु॒रे॒ते हि
य॒ज्ञं व॑ह॒त इति॒ ते त्वा॒व नो॒थ्सृ॒ज्ये इ॒त्या॒हु॒र्ये अ॒वा॒न्त॒रं य॒ज्ञं भे॒जा॒ते
इति॒ या प्र॒थ॒मा व्य॑ष्ट॒का त॒स्यामु॒थ्–सृ॒ज्य॒मि॒त्या॒हु॒रेष॒ वै मा॒सो वि॒शर॒
इति॒ नाऽऽ*दि॒ष्ट – [] 19

TS 7.5.7.1 - Padam

उ॒थ्सृ॒ज्या(३)मि॒त्यु॒त् – सृ॒ज्या(३)म् । न ।
उ॒थ्सृ॒ज्या(३)मि॒त्यु॒त्– सृ॒ज्या(३)म् । इति॒ । मी॒मा॒ञ्स॒न्ते ।
ब्र॒ह्म॒वा॒दि॒न इति॒ ब्र॒ह्म – वा॒दि॒नः । तत् । उ॒ । आ॒हुः ।
उ॒थ्सृ॒ज्य॒मि॒त्यु॒त् – सृ॒ज्य॒म् ॥ ए॒व । इति॒ ।
अ॒मा॒वा॒स्या॒या॒मि॒त्य॒मा – वा॒स्या॒याम् । च॒ । पौ॒र्ण॒मा॒स्या॒मि॒ति
पौ॒र्ण – मा॒स्याम् । च॒ । उ॒थ्सृ॒ज्य॒मि॒त्यु॒त् – सृ॒ज्य॒म् ॥ इति॒ । आ॒हुः ।

ए॒ते इति॑ । हि॒ । य॒ज्ञम् । वह॑तः । इति॑ । ते इति॑ । तु॒ । वाव॑ । न॒ ।

उ॒थ्सृ॒ज्ये इत्यु॑त् – सृ॒ज्ये॑ । इति॑ । आ॒हुः॑ । ये इति॑ ।

अ॒वा॒न्त॒र॒मि॒त्य॒व – अ॒न्त॒र॒म् । य॒ज्ञम् । भे॒जा॒ते इति॑ । इति॑ । या॒ ।

प्र॒थ॒मा । व्य॒ष्ट॒के॒ति वि॒ – अ॒ष्ट॒का॒ । त॒स्याम्॑ ।

उ॒थ्सृ॒ज्य॒मि॒त्यु॑त् – सृ॒ज्य॒म् । इति॑ । आ॒हुः॑ । ए॒षः॑ । वै॒ । मा॒सः॑ ।

वि॒श॒र इति॑ वि॒ – श॒रः॑ । इति॑ । न॒ ।

आ॒दि॒ष्ट॒मि॒त्या – दि॒ष्ट॒म् । 19 (50)

TS 7.5.7.2

–मु॒थ्सृ॒जे॒यु–र्य॑दादिष्ट–मु॒थ्सृ॒जे॒युर्या॑दृ॒शे पु॒नः॑ प॒र्या॒प्ला॒वे म॒द्ध्ये॑

ष॒ड॒ह॒स्य॑ स॒ंप॒द्ये॑त ष॒ड॒है॒र्मा॒सान्थ् स॒ंपा॒द्य य॒थ् स॒प्त॒म– म॒ह॒स्त॒स्मि॒न्नु॒थ्

सृ॒जे॒यु–स्त॒द॒ग॒न॒ये व॒सु॒म॒ते पु॒रो॒डा॒श॒म॒ष्टा॒क॒पा॒लं नि॒र्व॒पे॒यु॒रै॒न्द्रं द॒धी॒न्द्रा॒य

म॒रु॒त्व॒ते पु॒रो॒डा॒श॒मे॒का॒द॒श॒क॒पा॒लं वै॒श्व॒दे॒वं द्वा॒द॒श॒क॒पा॒ल॒म॒ग्ने॒र्वै

व॒सु॒म॒तः प्रा॒त॒स्स॒व॒नं य॒द॒ग॒न॒ये व॒सु॒म॒ते पु॒रो॒डा॒श॒म॒ष्टा॒क॒पा॒लं नि॒र्व॒प॒न्ति

दे॒व॒ता॒मे॒व तद्–भा॒गि॒नीं कु॒र्व॒न्ति – [] 20

TS 7.5.7.2 - Padam

उ॒दि॒ति॑ । सृ॒जे॒युः॑ । यत् । आ॒दि॒ष्ट॒मि॒त्या – दि॒ष्ट॒म् ।
उ॒थ्सृ॒जे॒यु॒रि॒त्युत् – सृ॒जे॒युः॑ । या॒दृ॒शे॑ । पु॒नः॑ । प॒र्या॒प्ला॒व इति॑
प॒रि – आ॒प्ला॒वे । म॒द्ध्ये॑ । ष॒ड॒ह॒स्येति॑ षट् – अ॒ह॒स्य॑ ।
सं॒प॒द्ये॒तेति॑ सं – प॒द्ये॒त । ष॒ड॒है॒रिति॑ षट् – अ॒हैः॑ । मा॒सान् ।
सं॒पा॒द्ये॒ति सं – पा॒द्य॑ । यत् । स॒प्त॒म॒म् । अ॒हः॑ । तस्मि॒न् । उ॒दि॒ति॑ ।
सृ॒जे॒युः॑ । तत् । अ॒ग्नये॑ । वसु॑म॒त इति॑ वसु – म॒ते॑ । पु॒रो॒डा॒शम् ।
अ॒ष्टा॒क॒पा॒ल॒मि॒त्य॒ष्टा – क॒पा॒ल॒म् । नि॒रि॒तिः॑ । व॒पे॒युः॑ । ऐ॒न्द्र॒म् । द॒धि॑ ।
इ॒न्द्रा॒य॑ । म॒रु॒त्व॒ते॑ । पु॒रो॒डा॒शम् ।
ए॒का॒द॒श॒क॒पा॒ल॒मि॒त्ये॒का॒द॒श – क॒पा॒ल॒म् । वै॒श्व॒दे॒व॒मि॒ति॑ वै॒श्व॒-दे॒व॒म् ।
द्वा॒द॒श॒क॒पा॒ल॒मि॒ति॑ द्वा॒द॒श – क॒पा॒ल॒म् । अ॒ग्नेः॑ । वै । वसु॑म॒त इति॑
वसु॑ – म॒तः॑ । प्रा॒त॒स्स॒व॒न॒मि॒ति॑ प्रा॒तः॑ – स॒व॒न॒म् । यत् । अ॒ग्नये॑ ।
वसु॑म॒त इति॑ वसु॑-म॒ते॑ । पु॒रो॒डा॒शम् । अ॒ष्टा॒क॒पा॒ल॒मि॒त्य॒ष्टा-क॒पा॒ल॒म् ।
नि॒र्व॒प॒न्तीति॑ निः – व॒प॒न्ति॑ । दे॒व॒ता॒म् । ए॒व । तत् । भा॒गि॒नी॒म् ।
कु॒र्व॒न्ति॑ । 20 (50)

TS 7.5.7.3

स॒वन॒म॒ष्टा॒भि॒रु॒प॒ य॒न्ति॒ य॒दै॒न्द्रं॑ द॒धि॒ भ॒व॒ती॒न्द्र॒मे॒व॒ तद्-भा॒ग॒धे॒या॒न्त्र॒
च्या॒व॒य॒न्ती॒न्द्र॒स्य॒ वै म॒रु॒त्व॒तो मा॒द्ध्य॒न्दि॒न॒ꣳ स॒वनं॑ य॒दि॒न्द्रा॒य म॒रु॒त्व॒ते
पु॒रो॒डा॒श॒मे॒का॒द॒श॒क॒पा॒लं नि॒र्व॒प॒न्ति॒ दे॒व॒ता॒मे॒व॒ तद्-भा॒गि॒नीं॑ कु॒र्व॒न्ति॒
स॒वन॒मे॒का॒द॒श॒भि॒रु॒प॒ य॒न्ति॒ वि॒श्वे॑षां॒ वै दे॒वा॒ना॒मृ॒भु॒म॒तां॑
तृ॒ती॒य॒स॒वनं॑ यद्-वै॒श्व॒दे॒वं द्वा॒द॒श॒क॒पा॒लं नि॒र्व॒प॒न्ति॒ दे॒व॒ता॒ ए॒व॒ तद्-
भा॒गि॒नीः॑ कु॒र्व॒न्ति॒ स॒वनं॑ द्वा॒द॒श॒भि॒ - [] 21

TS 7.5.7.3 - Padam

स॒वन॒म् । अ॒ष्टा॒भिः॑ । उ॒पे॒ति॑ । य॒न्ति॒ । य॒त् । ऐ॒न्द्र॒म् । द॒धि॒ । भ॒व॒ति॒ ।
इ॒न्द्र॒म् । ए॒व॒ । त॒त् । भा॒ग॒धे॒या॒दि॒ति॒ भा॒ग॒-धे॒या॒त् । न॒ । च्या॒व॒य॒न्ति॒ ।
इ॒न्द्र॒स्य॒ । वै । म॒रु॒त्व॒तः॑ । मा॒द्ध्य॒न्दि॒न॒म् । स॒वन॒म् । य॒त् । इ॒न्द्रा॒य॒ ।
म॒रु॒त्व॒ते॒ । पु॒रो॒डा॒श॒म् । ए॒का॒द॒श॒क॒पा॒ल॒मि॒त्ये॒का॒द॒श॒ - क॒पा॒ल॒म् ।
नि॒र्व॒प॒न्ती॒ति॒ निः-व॑प॒न्ति॒ । दे॒व॒ता॒म् । ए॒व॒ । त॒त् । भा॒गि॒नी॒म् ।
कु॒र्व॒न्ति॒ । स॒वन॒म् । ए॒का॒द॒श॒भि॒रि॒त्ये॒का॒द॒श॒ - भिः॑ । उ॒पे॒ति॑ । य॒न्ति॒ ।
वि॒श्वे॑षा॒म् । वै । दे॒वा॒ना॒म् । ऋ॒भु॒म॒ता॒मि॒त्यृ॒भु॒ - म॒ता॒म् ।

तृ॒ती॒य॒स॒व॒न॒मि॒ति॑ तृ॒ती॒य॒-स॒व॒न॒म् । यत् । वै॒श्व॒दे॒व॒मि॒ति॑ वै॒श्व॒-दे॒व॒म् ।
द्वा॒द॒श॒क॒पा॒ल॒मि॒ति॑ द्वा॒द॒श॒ - क॒पा॒ल॒म् । नि॒र्व॒प॒न्ती॒ति॑ निः - व॒प॒न्ति॑ ।
दे॒वताः॑ । ए॒व । तत् । भा॒गिनीः॑ । कु॒र्व॒न्ति॑ । स॒व॒न॒म् ।

द्वा॒द॒श॒भि॒रि॒ति॑ द्वा॒द॒श॒ - भिः । 21 (50)

TS 7.5.7.4

-रु॒प॒ य॒न्ति॑ प्रा॒जा॒प॒त्यं॑ प॒शु॒मा ल॒भ॒न्ते॑ य॒ज्ञो वै॑ प्र॒जा॒प॒ति॒-र्य॒ज्ञ॒स्या-
न॒नु॒स॒र्गा॒या॒भि॒व॒र्त॑ इ॒तः॑ ष॒ण्मा॒सो ब्र॒ह्म॒सा॒मं भ॑व॒ति॒ ब्र॒ह्म॒ वा अ॑भि॒व॒र्तो
ब्र॒ह्म॒णै॒व तथ्॑ सु॒व॒र्गं लो॒क॒-म॑भि॒व॒र्त॒य॒न्तो॑ य॒न्ति॑ प्र॒ति॒कू॒ल॒मि॒व॒ ही॒तः॑
सु॒व॒र्गो लो॒क॒ इन्द्र॑ क्र॒तुं न॒ आ भ॑र पि॒ता पु॒त्रेभ्यो॑ यथा॑ ।
शि॒क्षा नो॑ अ॒स्मिन् पु॑रु॒हूत॒ याम॑नि जी॒वा ज्यो॑ति॒रशी॒म॒ही॒त्य॒ ()-मु॑त
आ॒य॒ताꣳ ष॒ण्मा॒सो ब्र॒ह्म॒सा॒मं भ॑व॒त्ययं॑ वै लो॒को ज्यो॑तिः प्र॒जा
ज्यो॑ति॒रि॒ममे॒व तल्लो॒कं प॑श्य॒न्तोऽभि॑व॒दन्त॒ आ य॑न्ति ॥ 22

TS 7.5.7.4 - Padam

उ॒पे॒ति॑ । य॒न्ति॑ । प्रा॒जा॒प॒त्यमि॒ति॑ प्रा॒जा - प॒त्यम् । प॒शुम् । ए॒ति॑ ।
ल॒भ॒न्ते॑ । य॒ज्ञः । वै । प्र॒जा॒प॒ति॒रि॒ति॑ प्र॒जा - प॒तिः । य॒ज्ञ॒स्य॑ ।

अननु॑सर्गा॒येत्यननु॑ – सर्गा॒य । अभि॒वर्त॑ इत्य॒भि – वर्तः॑ । इतः॑ ।
 षट् । मा॒सः । ब्र॒ह्मसा॒ममि॒ति ब्र॒ह्म – सा॒मम् । भ॒वति॑ । ब्र॒ह्म । वै ।
 अभि॒वर्त॑ इत्य॒भि – वर्तः॑ । ब्र॒ह्मणा॑ । ए॒व । तत् । सु॒वर्गमि॒ति
 सु॒वः – गम् । लो॒कम् । अभि॒वर्त॑यन्त॒ इत्य॒भि – वर्त॑यन्तः । य॒न्ति ।
 प्र॒ति॒कू॒लमि॒ति प्र॒ति – कू॒लम् । इ॒व । हि । इतः॑ । सु॒वर्ग इति॑
 सु॒वः – गः । लो॒कः । इन्द्र॑ । क्र॒तुम् । नः । ए॒ति । भ॒र । पि॒ता ।
 पु॒त्रेभ्यः॑ । यथा॑ ॥ शि॒क्ष । नः । अ॒स्मिन् । पु॒रु॒हू॒तेति॑ पु॒रु – हू॒त ।
 या॒मनि॑ । जी॒वाः । ज्यो॒तिः । अ॒शी॒महि॑ । इति॑ () । अ॒मु॒तः ।
 आ॒य॒तामि॒त्या – य॒ताम् । षट् । मा॒सः । ब्र॒ह्मसा॒ममि॒ति ब्र॒ह्म-सा॒मम् ।
 भ॒वति॑ । अ॒यम् । वै । लो॒कः । ज्यो॒तिः । प्र॒जेति॑ प्र-जा । ज्यो॒तिः ।
 इ॒मम् । ए॒व । तत् । लो॒कम् । पश्य॑न्तः ।
 अभि॒वद॑न्त॒ इत्य॒भि – वद॑न्तः । ए॒ति । य॒न्ति ॥ 22 (70)
 (नाऽऽदि॑ष्टं – कु॒र्वन्ति॑ – द्वा॒दश॒भि – रि॒ति- वि॒शति॑श्च) (A7)

TS 7.5.8.1

दे॒वानां॑ वा॒ अ॒न्तं॑ ज॒ग्मु॑षामिन्द्रि॒यं वी॒र्यं॑-मपा॒क्राम॑त् तत्
क्रो॒शेना॑वारु॒न्धत॑ तत् क्रो॒शस्य॑ क्रो॒शत्वं॑ यत् क्रो॒शेन॑ चा॒त्वा॒लस्या॑न्ते
स्तु॒वन्ति॑ य॒ज्ञस्यै॑वान्तं॑ ग॒त्वेन्द्रि॒यं वी॒र्यं॑मव॑ रु॒न्धते॑ स॒त्रस्य॑द्द॒र्धा
ऽह॒वनी॑यस्यान्ते॑ स्तु॒वन्त्यग्नि॑-मे॒वोप॑द्-र॒ष्टारं॑ कृ॒त्वर्द्धि॑मु॒प य॑न्ति
प्र॒जाप॑तेर्हृ॒दये॑न ह॒विर्द्धि॑नेऽन्तः॑ स्तु॒वन्ति॑ प्रे॒माण॑मे॒वास्य॑
गच्छ॑न्ति श॒लोके॑न पु॒रस्ता॑त् सद॒सः - [] 23

TS 7.5.8.1 - Padam

दे॒वाना॑म् । वै । अ॒न्तम् । ज॒ग्मु॑षाम् । इन्द्रि॒यम् । वी॒र्यम् । अ॒पेति॑ ।
अ॒क्राम॑त् । तत् । क्रो॒शेन॑ । अ॒वेति॑ । अ॒रु॒न्धत॑ । तत् । क्रो॒शस्य॑ ।
क्रो॒श॒त्वमि॑ति क्रो॒श - त्वम् । यत् । क्रो॒शेन॑ । चा॒त्वा॒लस्य॑ । अ॒न्ते॑ ।
स्तु॒वन्ति॑ । य॒ज्ञस्य॑ । ए॒व । अ॒न्तम् । ग॒त्वा । इन्द्रि॒यम् । वी॒र्यम् ।
अ॒वेति॑ । रु॒न्धते॑ । स॒त्रस्य॑द्द॒र्धा । आ॒ह॒वनी॑यस्येत्या॑ - ह॒वनी॑यस्य ।
अ॒न्ते॑ । स्तु॒वन्ति॑ । अ॒ग्निम् । ए॒व । उ॒प॒द्र॒ष्टार॑मित्यू॒प - द्र॒ष्टार॑म् ।

कृ॒त्वा । ऋ॒द्धि॑म् । उपे॑ति । य॒न्ति॑ । प्र॒जाप॑त॒र्हृ॒दये॑न । ह॒वि॒र्धा॒न इति॑
ह॒विः॑ – धा॒ने॑ । अ॒न्तः । स्तु॒वन्ति॑ । प्रे॒माण॑म् । ए॒व । अ॒स्य॑ ।
ग॒च्छ॒न्ति॑ । श्लो॒के॒न॑ । पु॒रस्ता॑त् । स॒दसः॑ । 23 (50)

TS 7.5.8.2

स्तु॒वन्त्यनु॑श्लोकेन प॒श्चाद्-य॒ज्ञस्यै॑वान्तं ग॒त्वा श्लो॑क॒भाजो॑ भवन्ति
न॒वभि॑-र॒द्ध्वर्यु॑रुद्-गा॒यति॑ न॒व वै पु॑रुषे प्रा॒णाः प्रा॒णाने॒व यज॑मानेषु
दधा॑ति सर्वा ऐ॒न्द्रियो॑ भवन्ति प्रा॒णेष्वे॒वेन्द्रि॑यं दध-त्यप्रति॑हताभिरुद्-
गा॒यति॑ तस्मा॑त् पु॒रुषः॑ सर्वा॒ण्यन्या॑नि शी॒र्ष्णोऽङ्गानि॑ प्रत्य॑चति शिर
ए॒व न प॑ञ्चद॒श॒र्था॒न्तरं॑ भवतीन्द्रि॒यमे॒वाव रु॑न्धते सप्तद॒शं-[] 24

TS 7.5.8.2 - Padam

स्तु॒वन्ति॑ । अनु॑श्लोके॒नेत्यनु॑ – श्लो॒के॒न॑ । प॒श्चात् । य॒ज्ञस्य॑ । ए॒व ।
अ॒न्तम्॑ । ग॒त्वा । श्लो॒क॒भाज॑ इति॑ श्लो॒क – भा॒जः॑ । भव॑न्ति ।
न॒वभि॑रिति॑ न॒व – भिः॑ । अ॒द्ध्वर्युः॑ । उ॒दिति॑ । गा॒यति॑ । न॒व । वै ।
पु॒रुषे॑ । प्रा॒णा इति॑ प्र – अ॒नाः॑ । प्रा॒णानिति॑ प्र – अ॒नान्॑ । ए॒व ।

यज॑मानेषु । द॒धा॒ति॒ । सर्वाः॑ । ऐन्द्रि॑यः । भव॑न्ति । प्रा॒णेष्वि॑ति
प्र – अ॒नेषु॑ । ए॒व । इन्द्रि॑यम् । द॒ध॒ति॒ ।
अप्र॑तिह॒ताभि॑रित्यप्रति – ह॒ताभिः॑ । उदि॑ति । गा॒य॒ति॒ । तस्मा॑त् ।
पुरु॑षः । सर्वा॑णि । अ॒न्यानि॑ । शी॒र्ष्णाः॑ । अ॒ङ्गानि॑ । प्र॒तीति॑ । अ॒च॒ति॒ ।
शि॒रः॑ । ए॒व । न । पञ्च॑द॒शमि॑ति पञ्च – द॒शम् ।
रथ॑न्तरमि॒ति रथं॑-त॒रम् । भव॑ति । इन्द्रि॑यम् । ए॒व । अवे॑ति । रु॒न्ध॒ते॒ ।
सप्त॑द॒शमि॑ति सप्त – द॒शम् । 24 (50)

TS 7.5.8.3

बृ॒ह-द॒न्नाद्य॑स्याव॒रुद्ध्य॑ अथो प्रै॒व तेन॑ जायन्त॒ एकवि॑ंशं भ॒द्रं
द्वि॒पदा॑सु प्र॒तिष्ठि॑त्यै प॒त्नय॑ उप॒ गाय॑न्ति मिथु॒नत्वाय॑ प्र॒जात्यै॑ प्र॒जाप॑तिः
प्र॒जा अ॑सृज॒त सोऽका॑मय॒ताऽऽ*सा॑मह॒ राज्यं॑ प॒रीया॑मि॒ति तासा॑म्
राज॑नेनै॒व रा॒ज्यं प॑र्यैत् तद्-राज॑नस्य॒ राज॑न॒त्वं यद्-राज॑नं भव॒ति
प्र॒जाना॑मे॒व तद्-यज॑माना रा॒ज्यं परि॑ यन्ति पञ्चवि॑ंशं भव॒ति
प्र॒जाप॑ते – [] 25

TS 7.5.8.3 - Padam

बृ॒हत् । अ॒न्नाद्य॒स्येत्य॑न्न – अद्य॑स्य । अ॒वरु॑द्ध्य॒ इत्य॑व – रु॒द्ध्यै ।
अथो॒ इति॑ । प्रेति॑ । ए॒व । तेन॑ । जा॒यन्ते॑ ।
ए॒क॒वि॒ंश॒मित्ये॑क – वि॒ंश॒म् । भ॒द्रम् । द्वि॒पदा॑स्विति॑ द्वि – पदा॑सु ।
प्रति॑ष्ठित्या॒ इति॑ प्रति॑ – स्थि॒त्यै । प॒त्नयः॑ । उपेति॑ । गा॒यन्ति॑ ।
मि॒थुन॑त्वायेति॑ मि॒थुन॑ – त्वाय॑ । प्र॒जात्या॑ इति॑ प्र – जा॒त्यै ।
प्र॒जाप॑तिरिति॑ प्र॒जा – प॒तिः । प्र॒जा इति॑ प्र-जाः । अ॒सृज॑त । सः ।
अ॒क्राम॑यत । आ॒साम् । अ॒हम् । रा॒ज्यम् । परी॑ति । इ॒याम् । इति॑ ।
ता॒साम् । रा॒जने॑न । ए॒व । रा॒ज्यम् । परी॑ति । ऐ॒त् । तत् । रा॒जन॑स्य ।
रा॒जन॑त्वमिति॑ रा॒जन॑ – त्वम् । यत् । रा॒जन॑म् । भव॑ति । प्र॒जाना॑मिति॑
प्र – जा॒नाम् । ए॒व । तत् । यज॑मानाः । रा॒ज्यम् । परी॑ति । य॒न्ति ।
पञ्च॑वि॒ंशमि॑ति पञ्च – वि॒ंश॒म् । भव॑ति ।
प्र॒जाप॑तेरिति॑ प्र॒जा – प॒तेः । 25 (50)

TS 7.5.8.4

–रा॒प्त्यै॑ प॒ञ्च॒भिः–स्ति॑ष्ठन्तः॒ स्तु॒वन्ति॑ दे॒वलो॒कमे॒वाभि॑ ज॒यन्ति॑
प॒ञ्च॒भिरा॒सीना॑ म॒नुष्य॒लो॒कमे॒वाभि॑ ज॒यन्ति॑ द॒श संप॑द्यन्ते द॒शाक्ष॑रा
वि॒राडन्नं॑ वि॒राड् वि॒राजै॒वा–न्नाद्य॑मव॒ रुन्ध॑ते प॒ञ्च॒धा वि॒निष॑द्य॒ स्तु॒वन्ति॑
प॒ञ्च दि॒शो दि॒क्षवे॑व प्र॒ति॒तिष्ठ॑न्त्ये॒कैक॒याऽस्तु॑तया स॒माय॑न्ति दि॒ग्भ्य
ए॒वान्नाद्य॑ सं भ॒रन्ति॑ ताभिः–रु॒द्गातो॑द्–गा॒यति॑ दि॒ग्भ्य

ए॒वान्नाद्य॑–[] 26

TS 7.5.8.4 - Padam

आ॒प्त्यै॑ । प॒ञ्च॒भिरि॑ति॒ प॒ञ्च – भिः॑ । ति॑ष्ठन्तः । स्तु॒वन्ति॑ ।
दे॒वलो॒कमि॑ति॒ देव॑ – लो॒कम् । ए॒व । अ॒भीति॑ । ज॒यन्ति॑ ।
प॒ञ्च॒भिरि॑ति॒ प॒ञ्च – भिः॑ । आ॒सीनाः॑ । म॒नुष्य॒लो॒कमि॑ति॒
म॒नुष्य॑ – लो॒कम् । ए॒व । अ॒भीति॑ । ज॒यन्ति॑ । द॒श । स॒मिति॑ ।
प॒द्यन्ते॑ । द॒शाक्ष॑रेति॒ दश॑ – अ॒क्षरा॑ । वि॒राडि॑ति॒ वि – राट् ।
अ॒न्नम् । वि॒राडि॑ति॒ वि – राट् । वि॒राजे॑ति॒ वि – राजा॑ । ए॒व ।
अ॒न्नाद्य॑मित्य॒न्न – अद्य॑म् । अ॒वेति॑ । रु॒न्धते॑ । प॒ञ्च॒धेति॑ प॒ञ्च – धा ।

वि॒नि॒ष॒द्ये॒ति॒ वि॒ – नि॒ष॒द्य॑ । स्तु॒व॒न्ति॑ । प॒ञ्च॑ । दि॒शः॑ । दि॒क्षु॑ । ए॒व ।
प्र॒ती॒ति॑ । ति॒ष्ठ॒न्ति॑ । ए॒कै॒क॒ये॒त्ये॒क॒या॑ – ए॒क॒या॑ । अस्तु॒त॒या॑ ।
स॒मा॒य॒न्ती॒ति॑ सं – आ॒य॒न्ति॑ । दि॒ग्भ्य॑ इति॑ दिक् – भ्यः॑ । ए॒व ।
अ॒न्ना॒द्य॒मि॒त्य॒न्न॑ – अ॒द्यम्॑ । स॒मि॒ति॑ । भ॒र॒न्ति॑ । ता॒भिः॑ ।
उ॒द्गा॒ते॒त्यु॒त् – गा॒ता॑ । उ॒दि॒ति॑ । गा॒य॒ति॑ । दि॒ग्भ्य॑ इति॑ दिक् – भ्यः॑ ।
ए॒व । अ॒न्ना॒द्य॒मि॒त्य॒न्न॑ – अ॒द्यम्॑ । 26 (50)

TS 7.5.8.5

सं॒भृ॒त्य॑ ते॒ज आ॒त्मन् द॑धते॒ तस्मा॒दे॒कः प्रा॒णः सर्वा॒ण्यङ्गान्य॑व॒त्यथो॑
यथा॑ सु॒पर्ण॑ उत्प॒तिष्य॑ज्छिर॒ उत्त॒मं कुरु॑त ए॒वमे॒व तद्-य॑ज॒मा॒नाः
प्र॒जा॒नामु॒त्त॒मा भ॑व॒न्त्या॒स॒न्दी-मु॒द्गा॒ता ऽऽरो॑ह॒ति सा॒म्राज्य॑मे॒व ग॑च्छ॒न्ति
प्ले॒ङ्ख॑ होता॒ नाक॑स्यै॒व पृ॒ष्ठ॑ रो॒ह॒न्ति कू॒र्चा॒व॒ध्व॒र्यु-ब्र॑ध्नस्यै॒व
वि॒ष्ट॒पं ग॑च्छ॒न्त्ये॒ताव॑न्तो॒ वै दे॒वलो॒कास्ते॒ष्वे॒व यथा॑पूर्वं॒ प्रति॑ ()
ति॒ष्ठ॒न्त्यथो॑ आ॒क्रम॑णमे॒व तथ् से॒तुं य॑ज॒मा॒नाः कु॑र्वते सु॒व॒र्गस्य॑
लो॒कस्य॑ स॒म॒ष्ट्यै ॥ 27

TS 7.5.8.5 - Padam

संभृत्येति सं – भृत्य । तेजः । आत्मन् । दधते । तस्मात् । एकः ।
प्राण इति प्र – अनः । सर्वाणि । अङ्गानि । अवति । अथो इति ।
यथा । सुपर्ण इति सु – पर्णः । उत्पतिष्यन्नित्युत् – पतिष्यन् ।
शिरः । उत्तममित्युत् – तमम् । कुरुते । एवम् । एव । तत् ।
यजमानाः । प्रजानामिति प्र – जानाम् । उत्तमा इत्युत् – तमाः ।
भवन्ति । आसन्दीमित्या – सन्दीम् । उद्गातेत्युत् – गाता । एति ।
रोहति । साम्राज्यमिति सां – राज्यम् । एव । गच्छन्ति । प्लेङ्खम् ।
होता । नाकस्य । एव । पृष्ठम् । रोहन्ति । कूर्चौ । अद्ध्वर्युः ।
ब्रद्धनस्य । एव । विष्टपम् । गच्छन्ति । एतावन्तः । वै । देवलोका
इति देव – लोकाः । तेषु । एव । यथापूर्वमिति यथा – पूर्वम् ।
प्रतीति () । तिष्ठन्ति । अथो इति । आक्रमणमित्या – क्रमणम् ।
एव । तत् । सेतुम् । यजमानाः । कुर्वते । सुवर्गस्येति सुवः-गस्य ।
लोकस्य । समष्ट्या इति सं – अष्ट्यै ॥ 27 (61) (सदसः-सप्तदशं-
प्रजापते-र्गायति दिग्भ्य एवान्नाद्यं-प्रत्ये-कादश च) (A8)

TS 7.5.9.1

अ॒र्क्ये॒ण॒ वै॒ स॒ह॒स्र॒शः॑ प्र॒जा॒प॒तिः॑ प्र॒जा अ॒सृ॒ज॒त॒ ता॒भ्य इ॒ला॒न्दे॒ने॒रां॑
लू॒ता॒म॒वा॒रु॒न्ध॒ यद॒र्क्यं॑ भ॒व॒ति॑ प्र॒जा ए॒व तद्-य॒ज॒मा॒नाः॑ सृ॒ज॒न्त॒
इ॒ला॒न्दं॑ भ॒व॒ति॑ प्र॒जा॒भ्य॒ ए॒व सृ॒ष्टा॒भ्य॒ इ॒रां लू॒ता॒म॒व॒ रु॒न्ध॒ते॒ तस्मा॒द्या॒
स॒मा॒ स॒त्रं॑ स॒मृ॒द्धं॑ क्षो॒धु॒का॒स्ता॒ समां॑ प्र॒जा इ॒ष
ह्या॒सा॒मूर्ज॑मा॒द॒द॒ते॒ या॒ समां॑ व्यृ॒द्ध-म॑क्षो॒धु॒का॒स्ता॒
स॒मां प्र॒जा - [] 28

TS 7.5.9.1 - Padam

अ॒र्क्ये॒ण॒ । वै॒ । स॒ह॒स्र॒श इति॑ स॒ह॒स्र - शः॑ । प्र॒जा॒प॒ति॒रिति॑
प्र॒जा - प॒तिः॑ । प्र॒जा इति॑ प्र - जाः॑ । अ॒सृ॒ज॒त॒ । ता॒भ्यः॑ ।
इ॒ला॒न्दे॒न॒ । इ॒रा॒म् । लू॒ता॒म् । अ॒वे॒ति॑ । अ॒रु॒न्ध॒ । यत् । अ॒र्क्य॑म् ।
भ॒व॒ति॑ । प्र॒जा इति॑ प्र - जाः॑ । ए॒व । तत् । य॒ज॒मा॒नाः॑ । सृ॒ज॒न्ते॑ ।
इ॒ला॒न्द॑म् । भ॒व॒ति॑ । प्र॒जा॒भ्य इति॑ प्र - जा॒भ्यः॑ । ए॒व । सृ॒ष्टा॒भ्यः॑ ।
इ॒रा॒म् । लू॒ता॒म् । अ॒वे॒ति॑ । रु॒न्ध॒ते॒ । तस्मा॑त् । या॒म् । स॒मा॒म् ।
स॒त्र॑म् । स॒मृ॒द्धमि॒ति॒ सं - ऋ॒द्ध॑म् । क्षो॒धु॒काः॑ । ता॒म् । स॒मा॒म् ।

प्र॒जा इति॑ प्र – जाः । इ॒षम् । हि । आ॒साम् । ऊ॒र्जम् । आ॒दद॑त
इत्या॑ – द॒दते॑ । या॒म् । समा॑म् । व्यृ॒द्धमि॑ति वि – ऋ॒द्धम् ।

अक्षो॑धुकाः । ता॒म् । समा॑म् । प्र॒जा इति॑ प्र – जाः । 28 (50)

TS 7.5.9.2

न ह्या॒सामि॑षमूर्ज॑मा॒दद॑त उत्क्रो॑दं कु॒र्वते॑ यथा॑ ब॒न्धान्-मु॑मु॒चाना॑
उत्क्रो॑दं कु॒र्वत॑ ए॒वमे॒व तद्-यज॑माना दे॒वब॒न्धान्-मु॑मु॒चाना॑ उत्क्रो॑दं
कु॒र्वत॑ इ॒षमूर्ज॑मा॒त्मन् द॑धाना वा॒णः श॒तत॑न्तुर्भवति श॒तायुः॑ पु॒रुषः॑
श॒तेन्द्रि॑य आयु॑ष्येवेन्द्रि॒ये प्र॑ति तिष्ठ॑न्त्याजिं धा॒वन्त्यन॑भिजितस्या-
भिजि॑त्यै दु॒न्दुभी॑न्थ् स॒माघ्न॑न्ति प॒रमा॑ वा ए॒षा वा॒ग्या दु॒न्दुभौ॑
प॒रमा॑मे॒व – [] 29

TS 7.5.9.2 - Padam

न । हि । आ॒साम् । इ॒षम् । ऊ॒र्जम् । आ॒दद॑त इत्या॑ – द॒दते॑ ।
उत्क्रो॑दमित्युत् – क्रो॒दम् । कु॒र्वते॑ । यथा॑ । ब॒न्धात् । मु॒मु॒चा॒नाः ।
उत्क्रो॑दमित्युत् – क्रो॒दम् । कु॒र्वते॑ । ए॒वम् । ए॒व । तत् । यज॑मानाः ।
दे॒वब॒न्धादि॑ति दे॒व-ब॒न्धात् । मु॒मु॒चा॒नाः । उत्क्रो॑दमित्युत् – क्रो॒दम् ।

कुर्व॑ते । इ॒ष॒म् । ऊ॒र्ज॒म् । आ॒त्म॒न् । द॒धा॒नाः । वा॒णः । श॒त॒त॒न्तु॑रिति
श॒त – त॒न्तुः । भ॒व॒ति । श॒ता॒यु॒रिति॑ श॒त – आ॒युः । पु॒रु॒षः ।
श॒तेन्द्रि॑य इति॑ श॒त – इन्द्रि॑यः । आ॒यु॒षि । ए॒व । इन्द्रि॑ये । प्र॒तीति॑ ।
तिष्ठ॑न्ति । आ॒जि॒म् । धा॒व॒न्ति । अ॒न॒भि॒जि॒त॒स्ये॒त्य॒न॒भि – जि॒त॒स्य ।
अ॒भि॒जि॒त्या इ॒त्य॒भि – जि॒त्यै । दु॒न्दु॒भीन् ।
स॒मा॒घ्न॒न्तीति॑ सं – आ॒घ्न॒न्ति । प॒र॒मा । वै । ए॒षा । वाक् । या ।

दु॒न्दु॒भौ । प॒र॒माम् । ए॒व । 29 (50)

TS 7.5.9.3

वा॒च॒म॒व॒ रु॒न्ध॒ते भू॒मि॒दु॒न्दु॒भि॒मा घ्न॑न्ति यै॒वे॒मां वाक् प्र॑वि॒ष्टा ता॒मे॒वा॒व
रु॒न्ध॒ते ऽथो॑ इ॒मा॒मे॒व ज॑यन्ति सर्वा॒ वा॒चो॑ वदन्ति सर्वा॒सां
वा॒चा॒म॒व॒रु॒द्ध्य॑ आ॒र्द्रे॒र्च॒र्मन् व्या॑यच्छेते इन्द्रि॑यस्या॒ वरु॒द्ध्य॑ आ॒न्यः
क्रो॑शति प्रा॒न्यः श॑स्सति य आ॒क्रो॑शति पु॒ना॒त्ये॒वै॒ना॒न्त्स यः
प्र॒श॑स्सति पू॒ते॒ष्वे॒वा॒न्ना॒द्यं द॒धा॒त्यृषि॑कृतं च – [] 30

TS 7.5.9.3 - Padam

वाच॑म् । अ॒वेति॑ । रु॒न्ध॒ते । भू॒मि॒दु॒न्दु॒भि॒मि॒ति॑ भूमि॑ – दु॒न्दु॒भि॒म् ।
ए॒ति॑ । घ्न॒न्ति॑ । या । ए॒व । इ॒माम् । वाक् । प्र॒वि॒ष्टेति॑ प्र – वि॒ष्टा ।
ताम् । ए॒व । अ॒वेति॑ । रु॒न्ध॒ते । अथो॒ इति॑ । इ॒माम् । ए॒व । ज॒य॒न्ति॑ ।
सर्वाः॑ । वाचः॑ । व॒द॒न्ति॑ । सर्वा॑साम् । वा॒चाम् । अ॒वरु॑द्ध्य
इत्य॑व – रु॒द्ध्यै । आ॒र्द्रे । च॒र्मन् । व्या॒य॒च्छे॒ते इति॑ वि-आ॒य॒च्छे॒ते ।
इ॒न्द्रि॒यस्य॑ । अ॒वरु॑द्ध्य इत्य॑व – रु॒द्ध्यै । ए॒ति॑ । अ॒न्यः । क्रो॑शति ।
प्रेति॑ । अ॒न्यः । श॒ञ्स॒ति॑ । यः । आ॒क्रो॑श॒तीत्या॑-क्रो॑शति । पु॒नाति॑ ।
ए॒व । ए॒नान् । सः । यः । प्र॒श॒ञ्स॒तीति॑ प्र – श॒ञ्स॒ति॑ । पू॒तेषु॑ ।
ए॒व । अ॒न्नाद्य॑मित्य॒न्न – अद्य॑म् । द॒धाति॑ । ऋ॒षि॒कृत॑मित्यृ॒षि-कृत॑म् ।

च । 30 (50)

TS 7.5.9.4

वा ए॒ते दे॒वकृतं॑ च॒ पूर्वे॑र्मासै॒रव॑ रु॒न्ध॒ते यद्-भू॑ते॒च्छदा॑ञ् सामा॑नि
भव॑न्त्यु॒भय॑स्या॒वरु॑द्ध्यै य॒न्ति॒ वा ए॒ते मि॑थुनाद्ये सँव॑त्सर-
मु॒प॒य॒न्त्यन्त॑र्वे॒दि मि॑थुनौ सं भव॑तस्तेनै॒व मि॑थुना॒न्न य॒न्ति ॥ 31

TS 7.5.9.4 - Padam

वै । ए॒ते । दे॒वकृ॑तमि॒ति दे॒व-कृ॑तम् । च । पू॒र्वैः । मा॒सैः । अ॒वेति॑ ।
रु॒न्ध॒ते । यत् । भू॒तेच्छ॑दामि॒ति भू॒ते - छ॑दाम् । सा॒मा॒नि । भ॒वन्ति॑ ।
उ॒भय॑स्य । अ॒वरु॑द्ध्य॒ इत्य॑व - रु॒द्ध्यै । य॒न्ति । वै । ए॒ते ।
मि॒थु॒नात् । ये । सँ॒व॒थ्स॒रमि॒ति सं-व॑थ्स॒रम् । उ॒प॒य॒न्तीत्यु॑प-य॒न्ति ।
अ॒न्त॒र्वेदी॑त्य॒न्तः - वे॒दि । मि॒थु॒नौ । स॒मि॒ति । भ॒वतः॑ । ते॒न । ए॒व ।
मि॒थु॒नात् । न । य॒न्ति ॥ 31 (30)

(व्य॑द्धम॒क्षौधु॑का॒स्ताꣳ स॒माँ प्र॒जाः - प॒र॒मा॒मे॒व - च -
त्रि॑ꣳश॒च्च) (A9)

TS 7.5.10.1

च॒र्मा॒व भि॑न्दन्ति पा॒प्मान॑मे॒वैषा॑म॒व भि॑न्दन्ति माऽप॒ रा॒थ्सी॑र्माऽति॒
व्या॒थ्सी॑रित्या॒ह सं॒प्र॒त्यै॒वैषाँ॑ पा॒प्मान॑म॒व भि॑न्दन्त्यु॒दकु॑म्भान॒धिनि॑धाय॒
दा॒स्यो मा॒र्जा॒लीयं॑ परि॒ नृत्य॑न्ति प॒दो नि॑घ्न॒तीरि॑दं॒मधुं॑ गा॒य॒न्त्यो
मधु॑ वै दे॒वानाँ॑ प॒रम॑-म॒न्नाद्यं॑ प॒रम॑मे॒वा-न्ना॑द्यम॒व रु॒न्ध॒ते
प॒दो नि॑ घ्नन्ति म॒हीया॑मे॒वैषु॑ दधति ॥ 32

TS 7.5.10.1 - Padam

च॒र्म । अ॒वेति॑ । भि॒न्दन्ति॑ । पा॒प्मान॑म् । ए॒व । ए॒षाम् । अ॒वेति॑ ।
भि॒न्दन्ति॑ । मा । अ॒पेति॑ । रा॒थ्सीः । मा । अ॒तीति॑ । व्या॒थ्सीः । इति॑ ।
आ॒ह । संप्र॑तीति॑ सं – प्र॒ति । ए॒व । ए॒षाम् । पा॒प्मान॑म् । अ॒वेति॑ ।
भि॒न्दन्ति॑ । उ॒दकु॑म्भानित्यु॒द-कु॑म्भान् । अ॒धिनि॒धायेत्य॑धि – नि॒धाय॑ ।
दा॒स्यः । मा॒र्जा॒लीय॑म् । प॒रीति॑ । नृ॒त्यन्ति॑ । प॒दः । नि॒घ्नती॑रिति॑
नि – घ्न॒तीः । इ॒दंम॑धुमिती॒दं – म॑धुम् । गा॒यन्त्यः॑ । म॒धु । वै ।
दे॒वाना॑म् । प॒रम॑म् । अ॒न्नाद्य॑मित्य॒न्न – अ॑द्यम् । प॒रम॑म् । ए॒व ।
अ॒न्नाद्य॑मित्य॒न्न – अ॑द्यम् । अ॒वेति॑ । रु॒न्धते॑ । प॒दः । नी॒ति । घ्न॒न्ति ।
म॒हीया॑म् । ए॒व । ए॒षु । द॒धति॑ ॥ 32 (49)

(च॒र्मै – का॒न्नप॑ञ्चा॒शत्) (A10)

TS 7.5.11.1

पृ॒थि॒व्यै स्वा॑हा ऽन्त॑रि॒क्षाय॑ स्वा॒हा दि॒वे स्वा॑हा सं॒प्लोष्य॑ते स्वा॒हा
सं॒प्लव॑मानाय॑ स्वा॒हा सं॒प्लुता॑य॒ स्वाहा॑ मे॒घायिष्य॑ते स्वा॒हा मे॒घाय॑ते
स्वा॒हा मे॒घिता॑य॒ स्वाहा॑ मे॒घाय॑ स्वा॒हा नी॒हारा॑य॒ स्वाहा॑ नि॒हाका॑यै

स्वाहा॑ प्रा॒स॒चाय॑ स्वाहा॑ प्र॒च॒ला॒कायै॑ स्वाहा॑ वि॒द्योति॑ष्यते स्वाहा॑
वि॒द्योत॑मानाय॑ स्वाहा॑ सँ॒वि॒द्योत॑मानाय॑ स्वाहा॑ स्तनयिष्यते स्वाहा॑
स्तनय॑ते स्वाहो॑ –ग्र॒ स्तनय॑ते स्वाहा॑ वर्॒षिष्य॑ते स्वाहा॑ वर्॒षते॑
स्वाहा॑ ऽभि॒वर्ष॑ते स्वाहा॑ परि॒वर्ष॑ते स्वाहा॑ सँ॒वर्ष॑ते – [] 33

TS 7.5.11.1 - Padam

पृ॒थि॒व्यै॑ । स्वाहा॑ । अ॒न्त॒रि॒क्षाय॑ । स्वाहा॑ । दि॒वे॑ । स्वाहा॑ । सं॒प्लो॒ष्यत॑
इति॑ सं – प्लो॒ष्यते॑ । स्वाहा॑ । सं॒प्लव॑मानायेति॑ सं – प्लव॑मानाय॑ ।
स्वाहा॑ । सं॒प्लु॒तायेति॑ सं–प्लु॒ताय॑ । स्वाहा॑ । मे॒घायि॑ष्यते । स्वाहा॑ ।
मे॒घाय॑त इति॑ मे॒घ – य॑ते । स्वाहा॑ । मे॒घि॒ताय॑ । स्वाहा॑ । मे॒घाय॑ ।
स्वाहा॑ । नी॒हा॒राय॑ । स्वाहा॑ । नि॒हा॒काया॑ इति॑ नि–हा॒कायै॑ । स्वाहा॑ ।
प्रा॒स॒चाय॑ । स्वाहा॑ । प्र॒च॒ला॒काया॑ इति॑ प्र – च॒ला॒कायै॑ । स्वाहा॑ ।
वि॒द्योति॑ष्यत इति॑ वि – द्योति॑ष्यते । स्वाहा॑ । वि॒द्योत॑मानायेति॑
वि – द्योत॑मानाय॑ । स्वाहा॑ । सँ॒वि॒द्योत॑मानायेति॑ सं–वि॒द्योत॑मानाय॑ ।
स्वाहा॑ । स्तनयिष्यते । स्वाहा॑ । स्तनय॑ते । स्वाहा॑ । उ॒ग्रम् ।
स्तनय॑ते । स्वाहा॑ । वर्॒षिष्य॑ते । स्वाहा॑ । वर्॒षते॑ । स्वाहा॑ ।

अ॒भि॒वर्ष॑त॒ इत्य॑भि – वर्ष॑ते । स्वाहा॑ । परि॒वर्ष॑त॒ इति॑
परि – वर्ष॑ते । स्वाहा॑ । स॒वर्ष॑त॒ इति॑ सं – वर्ष॑ते । 33 (50)

TS 7.5.11.2

स्वाहा॑ अ॒नुवर्ष॑ते स्वाहा॑ शी॒कायिष्य॑ते स्वाहा॑ शी॒काय॑ते स्वाहा॑
शी॒कि॒ताय॑ स्वाहा॑ प्रोषिष्य॑ते स्वाहा॑ पु॒ष्ण॑ते स्वाहा॑ परिपु॒ष्ण॑ते स्वाहा॑ –
द॒ग्रहीष्य॑ते स्वाहा॑ द॒गृह्ण॑ते स्वाहा॑ – द॒गृही॑ताय॒ स्वाहा॑ वि॒प्लोष्य॑ते
स्वाहा॑ वि॒प्लव॑मानाय॒ स्वाहा॑ वि॒प्लुता॑य॒ स्वाहा॑ ऽऽत॑फ॒स्य॑ते स्वाहा॑
ऽऽत॑प॒ते स्वाहा॑ – ग्र॒मात॑प॒ते स्वाहा॑ – ग॒र्भ्यः॑ स्वाहा॑ य॒जुर्भ्यः॑ स्वाहा॑
सा॒म॒भ्यः॑ स्वाहा॑ ऽङ्गि॒रोभ्यः॑ स्वाहा॑ वे॒देभ्यः॑ स्वाहा॑ गा॒थाभ्यः॑ स्वाहा॑
ना॒रा॒श॒सी॒भ्यः॑ स्वाहा॑ रै॒भीभ्यः॑ स्वाहा॑ () स॒र्वस्मै॑ स्वाहा॑ ॥ 34

TS 7.5.11.2 - Padam

स्वाहा॑ । अ॒नुवर्ष॑त॒ इत्य॑नु – वर्ष॑ते । स्वाहा॑ । शी॒कायिष्य॑ते ।
स्वाहा॑ । शी॒काय॑त॒ इति॑ शी॒क – य॑ते । स्वाहा॑ । शी॒कि॒ताय॑ ।
स्वाहा॑ । प्रोषिष्य॑ते । स्वाहा॑ । पु॒ष्ण॑ते । स्वाहा॑ । परिपु॒ष्ण॑त॒ इति॑
परि – पु॒ष्ण॑ते । स्वाहा॑ । उ॒द्ग्रहीष्य॑त॒ इत्यु॑त् – ग्र॒हीष्य॑ते । स्वाहा॑ ।

उ॒द्गृ॒ह्ण॒त इत्यु॑त् – गृ॒ह्ण॒ते । स्वा॒हा ॥ उ॒द्गृ॒ही॒तायेत्यु॑त् – गृ॒ही॒ताय॑ ।
 स्वा॒हा ॥ वि॒प्लो॒ष्य॒त इति॑ वि – प्लो॒ष्य॒ते । स्वा॒हा ॥ वि॒प्ल॒व॒मा॒नायेति॑
 वि – प्ल॒व॒मा॒नाय॑ । स्वा॒हा ॥ वि॒प्लु॒तायेति॑ वि – प्लु॒ताय॑ । स्वा॒हा ॥
 आ॒त॒प॒स्य॒त इत्या॑ – त॒प॒स्य॒ते । स्वा॒हा ॥ आ॒त॒प॒त इत्या॑ – त॒प॒ते ।
 स्वा॒हा ॥ उ॒ग्र॒म् । आ॒त॒प॒त इत्या॑ – त॒प॒ते । स्वा॒हा ॥
 ऋ॒ग्भ्य॑ इत्यृ॒क् – भ्यः॑ । स्वा॒हा ॥ य॒जु॒र्भ्य॑ इति॑ य॒जुः – भ्यः॑ ।
 स्वा॒हा ॥ सा॒म॒भ्य॑ इति॑ सा॒म – भ्यः॑ । स्वा॒हा ॥ अ॒ङ्गि॒रो॒भ्य॑
 इत्यङ्गि॑रः – भ्यः॑ । स्वा॒हा ॥ वे॒दे॒भ्यः॑ । स्वा॒हा ॥ गा॒था॒भ्यः॑ । स्वा॒हा ॥
 ना॒रा॒श॒सी॒भ्यः॑ । स्वा॒हा ॥ रै॒भी॒भ्यः॑ । स्वा॒हा () । स॒र्व॒स्मै॑ ।
 स्वा॒हा ॥ 34 (52) (स॒र्व॒ष॒ते – रै॒भी॒भ्यः॑ स्वा॒हा – द्वे च॑) (A11)

TS 7.5.12.1

द॒त्व॒ते स्वा॒हा ऽद॒न्त॒काय॑ स्वा॒हा प्रा॒णि॒ने स्वा॒हा ऽप्रा॒णाय॑ स्वा॒हा
 मु॒ख॒व॒ते स्वा॒हा ऽमु॒खाय॑ स्वा॒हा ना॒सि॒क॒व॒ते स्वा॒हा ऽना॒सि॒काय॑ स्वा॒हा
 ऽक्ष॒ण्व॒ते स्वा॒हा ऽन॒क्षि॒काय॑ स्वा॒हा क॒र्णि॒ने स्वा॒हा ऽक॒र्ण॒काय॑ स्वा॒हा
 शी॒र्ष॒ण्व॒ते स्वा॒हा ऽशी॒र्ष॒काय॑ स्वा॒हा प॒द्व॒ते स्वा॒हा ऽपा॒द॒काय॑ स्वा॒हा

प्रा॒ण॒ते स्वा॒हा ऽप्रा॒ण॒ते स्वा॒हा व॒द॒ते स्वा॒हा ऽव॒द॒ते स्वा॒हा प॒श्य॒ते
स्वा॒हा ऽप॒श्य॒ते स्वा॒हा शृ॒ण्व॒ते स्वा॒हा ऽशृ॒ण्व॒ते स्वा॒हा म॒न॒स्वि॒ने
स्वा॒हा – [] 35

TS 7.5.12.1 - Padam

द॒त्व॒ते । स्वा॒हा । अ॒द॒न्त॒का॒य । स्वा॒हा । प्रा॒णि॒ने । स्वा॒हा ।
अ॒प्रा॒णाय॑ । स्वा॒हा । मु॒ख॒व॒त इति॑ मु॒ख॒-व॒ते । स्वा॒हा । अ॒मु॒खा॒य ।
स्वा॒हा । ना॒सि॒क॒व॒त इति॑ ना॒सि॒क – व॒ते । स्वा॒हा । अ॒ना॒सि॒का॒य ।
स्वा॒हा । अ॒क्ष॒ण्व॒त इत्य॑क्ष॒ण्-व॒ते । स्वा॒हा । अ॒न॒क्षि॒का॒य । स्वा॒हा ।
कर्॒णि॒ने । स्वा॒हा । अ॒कर्॒ण॒का॒य । स्वा॒हा । शी॒र्ष॒ण्व॒त इति॑
शी॒र्ष॒ण् – व॒ते । स्वा॒हा । अ॒शी॒र्ष॒का॒य । स्वा॒हा । प॒द्व॒त इति॑
प॒त् – व॒ते । स्वा॒हा । अ॒पा॒द॒का॒य । स्वा॒हा । प्रा॒ण॒त इति॑ प्र॒-अ॒न॒ते ।
स्वा॒हा । अ॒प्रा॒ण॒त इत्य॑प्र॒ – अ॒न॒ते । स्वा॒हा । व॒द॒ते । स्वा॒हा ।
अ॒व॒द॒ते । स्वा॒हा । प॒श्य॒ते । स्वा॒हा । अ॒प॒श्य॒ते । स्वा॒हा । शृ॒ण्व॒ते ।
स्वा॒हा । अ॒शृ॒ण्व॒ते । स्वा॒हा । म॒न॒स्वि॒ने । स्वा॒हा । 35 (50)

TS 7.5.12.2

अ॒मन॒से॒ स्वा॒हा॒ रे॒तस्वि॒ने॒ स्वा॒हा॒ अ॒रे॒तस्का॒य॒ स्वा॒हा॒ प्र॒जा॒भ्यः॒ स्वा॒हा॑
प्र॒ज॒न॒ना॒य॒ स्वा॒हा॒ लो॒म॒व॒ते॒ स्वा॒हा॒ अ॒लो॒म॒का॒य॒ स्वा॒हा॒ त्व॒चे॒ स्वा॒हा॑
अ॒त्व॒क्का॒य॒ स्वा॒हा॒ च॒र्म॒ण्व॒ते॒ स्वा॒हा॒ अ॒च॒र्म॒का॒य॒ स्वा॒हा॒ लो॒हि॒त॒व॒ते॒
स्वा॒हा॒ अ॒लो॒हि॒ता॒य॒ स्वा॒हा॒ मा॒स॒न्व॒ते॒ स्वा॒हा॒ अ॒मा॒स॒का॒य॒ स्वा॒हा॑
स्ना॒व॒भ्यः॒ स्वा॒हा॒ अ॒स्ना॒व॒का॒य॒ स्वा॒हा॒ स्थ॒न्व॒ते॒ स्वा॒हा॒ अ॒न॒स्थि॒का॒य॒
स्वा॒हा॒ म॒ज्ज॒न्व॒ते॒ स्वा॒हा॒ अ॒म॒ज्ज॒का॒य॒ स्वा॒हा॒ अ॒ङ्गि॒ने॒ स्वा॒हा॒ अ॒न॒ङ्गा॒य॒
स्वा॒हा॒ अ॒त्म॒ने॒ स्वा॒हा॒ अ॒ना॒त्म॒ने॒ स्वा॒हा॒ () स॒र्व॒स्मै॒ स्वा॒हा॑ ॥ 36

TS 7.5.12.2 - Padam

अ॒मन॒से॒ । स्वा॒हा॑ । रे॒तस्वि॒ने॒ । स्वा॒हा॑ । अ॒रे॒तस्का॒येत्य॒रेतः॑ – का॒य॒ ।
स्वा॒हा॑ । प्र॒जा॒भ्य॒ इति॑ प्र – जा॒भ्यः॑ । स्वा॒हा॑ । प्र॒ज॒न॒ना॒येति॑
प्र – ज॒न॒ना॒य॒ । स्वा॒हा॑ । लो॒म॒व॒त॒ इति॑ लो॒म॒ – व॒ते॒ । स्वा॒हा॑ ।
अ॒लो॒म॒का॒य॒ । स्वा॒हा॑ । त्व॒चे॒ । स्वा॒हा॑ । अ॒त्व॒क्का॒य॒ । स्वा॒हा॑ ।
च॒र्म॒ण्व॒त॒ इति॑ च॒र्म॒ण् – व॒ते॒ । स्वा॒हा॑ । अ॒च॒र्म॒का॒य॒ । स्वा॒हा॑ ।
लो॒हि॒त॒व॒त॒ इति॑ लो॒हि॒त॒ – व॒ते॒ । स्वा॒हा॑ । अ॒लो॒हि॒ता॒य॒ । स्वा॒हा॑ ।

मा॒ऽस॒न्व॒त॒ इति॑ मा॒ऽस॒न्-व॒ते॑ । स्वाहा॑ । अ॒मा॒ऽस॒का॒य॒ । स्वाहा॑ ।
स्ना॒व॒भ्य॒ इति॑ स्ना॒व॒ - भ्यः॑ । स्वाहा॑ । अ॒स्ना॒व॒का॒य॒ । स्वाहा॑ ।
अ॒स्थ॒न्व॒त॒ इत्य॑स्थ॒न्- व॒ते॑ । स्वाहा॑ । अ॒न॒स्थि॒का॒य॒ । स्वाहा॑ ।
म॒ज्ज॒न्व॒त॒ इति॑ म॒ज्ज॒न्- व॒ते॑ । स्वाहा॑ । अ॒म॒ज्ज॒का॒य॒ । स्वाहा॑ ।
अ॒ङ्गि॒ने॑ । स्वाहा॑ । अ॒न॒ङ्गा॒य॒ । स्वाहा॑ । आ॒त्म॒ने॑ । स्वाहा॑ ।
अ॒ना॒त्म॒ने॑ । स्वाहा॑ () । सर्व॑स्मै । स्वाहा॑ ॥ 36 (52)

(म॒न॒स्वि॒ने॒ स्वाहा॑ - ज्ञा॒त्म॒ने॒ स्वाहा॑ - द्वे च॑) (A12)

TS 7.5.13.1

क॒स्त्वा॒ यु॒न॒क्ति॒ स॒ त्वा॒ यु॒न॒क्तु॒ वि॒ष्णु॒स्त्वा॒ यु॒न॒क्त्व॒स्य॒ य॒ज्ञ॒स्य॒द्ध्यै॑
म॒ह्य॒ऽस॒न्न॒त्या॒ अ॒मु॒ष्मै॒ का॒मा॒याऽऽ*यु॒षे॒ त्वा॒ प्रा॒णाय॑ त्वा॒ ऽपा॒नाय॑
त्वा॒ व्या॒नाय॑ त्वा॒ व्यु॒ष्ट्यै॑ त्वा॒ र॒य्यै॑ त्वा॒ रा॒ध॒से॒ त्वा॒ घो॒षाय॑ त्वा॒ पो॒षाय॑
त्वा॒ ऽऽरा॒द्घो॒षाय॑ त्वा॒ प्र॒च्यु॒त्यै॑ त्वा ॥ 37

TS 7.5.13.1 - Padam

कः॑ । त्वा॒ । यु॒न॒क्ति॒ । सः॑ । त्वा॒ । यु॒न॒क्तु॒ । वि॒ष्णुः॑ । त्वा॒ । यु॒न॒क्तु॒ ।
अ॒स्य॑ । य॒ज्ञ॒स्य॑ । ऋ॒द्ध्यै॑ । म॒ह्यम्॑ । स॒न्न॒त्या॒ इति॑ सं - न॒त्यै॑ ।

अ॒मु॒ष्मै॑ । का॒माय॑ । आ॒यु॒षे । त्वा । प्रा॒णाये॑ति प्र – अ॒नाय॑ । त्वा ।
 अ॒पा॒नाये॑त्यप – अ॒नाय॑ । त्वा । व्या॒नाये॑ति वि – अ॒नाय॑ । त्वा ।
 व्यु॒ष्ट्या॑ इति वि – उ॒ष्ट्यै॑ । त्वा । र॒य्यै॑ । त्वा । रा॒ध॒से । त्वा ।
 घो॒षाय॑ । त्वा । पो॒षाय॑ । त्वा । आ॒रा॒द्घो॒षाये॑त्या॒रात् – घो॒षाय॑ ।
 त्वा । प्र॒च्यु॒त्या॑ इति प्र – च्यु॒त्यै॑ । त्वा ॥ 37 (38)

(क॒स्त्वा – ऽष्टा॒त्रिं॒शत्) (A13)

TS 7.5.14.1

अ॒ग्नये॑ गा॒य॒त्राय॑ त्रि॒वृ॒ते रा॒थ॒न्त॒राय॑ वा॒स॒न्ता॒या-ष्टा॑क॒पाल॑
 इ॒न्द्राय॑ त्रै॒ष्टु॒भाय॑ पञ्च॒द॒शाय॑ बा॒र्ह॒ताय॑ ग्रै॒ष्मा॒यैका॑द॒शक॑पालो
 वि॒श्वेभ्यो॑ दे॒वेभ्यो॑ जा॒ग॒तेभ्यः॑ स॒प्त॒द॒शेभ्यो॑ वै॒रू॒पेभ्यो॑ वा॒र्षि॒केभ्यो॑
 द्वा॒द॒शक॑पालो मि॒त्रा॒व॒रु॒णाभ्या॑-मा॒नु॒ष्टु॒भाभ्या॑-मे॒क॒विं॒शाभ्यां॑
 वै॒रा॒जाभ्यां॑ शार॒दाभ्यां॑ प॒य॒स्या बृ॒ह॒स्प॒तये॑ पा॒ङ्गाय॑ त्रि॒ण॒वाय॑
 शा॒क्व॒राय॑ है॒म॒न्ति॒काय॑ च॒रुः स॒वि॒त्र आ॒ति॒च्छ॒न्द॒साय॑ त्रय॒स्त्रिं॒शाय॑
 रै॒व॒ताय॑ शै॒शि॒राय॑ द्वा॒द॒शक॑पालो ऽदि॒त्यै वि॒ष्णु॑प॒त्यै च॒रु॒र॒ग्नये॑
 वै॒श्वान॑राय द्वा॒द॒शक॑पालो ऽनु॒म॒त्यै च॒रुः का॒य ए॒क॒क॒पालः॑ ॥ 38

TS 7.5.14.1 - Padam

अ॒ग्नये॑ । गाय॑त्राय । त्रि॒वृ॒त इति॑ त्रि॒-वृ॒ते । रा॒थ॒न्त॒रा॒येति॑ रा॒थं-त॒राय॑ ।
वा॒स॒न्ताय॑ । अ॒ष्टाक॑पाल इत्य॒ष्टा - क॒पालः । इन्द्रा॑य । त्रै॒ष्टु॒भाय॑ ।
पञ्च॑द॒शा॒येति॑ पञ्च - द॒शाय॑ । बा॒र्ह॒ताय॑ । ग्रै॒ष्माय॑ ।
एका॑द॒शक॑पाल इत्येका॑द॒श - क॒पालः । वि॒श्वेभ्यः॑ । दे॒वेभ्यः॑ ।
जा॒गते॑भ्यः । स॒प्तद॑शेभ्य इति स॒प्त - द॑शेभ्यः । वै॒रूपे॑भ्यः ।
वा॒र्षिके॑भ्यः । द्वा॒दशक॑पाल इति द्वा॒दश - क॒पालः ।
मि॒त्राव॑रुणाभ्यामिति मि॒त्रा - व॑रुणाभ्याम् ।
आ॒नु॒ष्टु॒भाभ्या॑मित्या॒नु- स्तु॒भाभ्या॑म् ।
ए॒क॒वि॒ं॒शाभ्या॑मित्ये॒क-वि॒ं॒शाभ्या॑म् । वै॒रा॒जाभ्या॑म् । शा॒र॒दाभ्या॑म् ।
प॒य॒स्या । बृ॒ह॒स्प॒तये॑ । पा॒ङ्काय॑ । त्रि॒ण॒वा॒येति॑ त्रि - न॒वाय॑ ।
शा॒क्व॒राय॑ । है॒म॒न्ति॒काय॑ । च॒रुः । स॒वि॒त्रे ।
आ॒ति॒च्छ॒न्द॒सा॒येत्या॑ति - छ॒न्द॒साय॑ । त्रय॑स्त्रि॒ं॒शा॒येति॑
त्रयः॑ - त्रि॒ं॒शा॒य । रै॒व॒ताय॑ । शै॒शि॒राय॑ ।
द्वा॒दशक॑पाल इति द्वा॒दश - क॒पालः । अ॒दि॒त्यै ।

विष्णु॑पत्न्या॒ इति॑ विष्णु॑ – पत्न्यै॑ । चरुः॑ ।

अ॒ग्नये॑ । वै॒श्वान॑राय॑ । द्वाद॑शकपाल॒ इति॑ द्वाद॑श – क॒पालः॑ ।

अनु॑मत्या॒ इत्यनु॑ – म॒त्यै । चरुः॑ । का॒यः ।

एक॑कपाल॒ इत्येक॑-क॒पालः॑ ॥ 38 (47)

(अ॒ग्नये॑ऽदि॒त्या अनु॑म॒त्यै – स॒प्तच॑त्वारि॒ंशत्) (A14)

TS 7.5.15.1

यो वा अ॒ग्नाव॑ग्निः प्र॒ह्रिय॑ते यश्च॒ सोमो॑ राजा॒ तयो॑रेष आ॒तिथ्यं॑
यद॑ग्नी॒षोमी॑योऽथै॒ष रु॒द्रो यश्ची॑यते यथ् संचि॑तेऽग्नावे॒तानि॑
हवी॑र्षि॒ न निर्व॑पे॒देष॑ ए॒व रु॒द्रोऽशान्त॑ उपो॒त्थाय॑ प्र॒जां प॒शून्
यज॑मानस्या॒भि म॑न्येत॒ यथ् संचि॑तेऽग्नावे॒तानि॑ हवी॑र्षि॒ निर्व॑पति
भा॒गधे॑ये॒नैवैन॑र् श॒मय॑ति॒ नास्य॑ रु॒द्रोऽशान्त॑ – [] 39

TS 7.5.15.1 - Padam

यः । वै । अ॒ग्नौ । अ॒ग्निः । प्र॒ह्रिय॑त॒ इति॑ प्र – ह्रि॒यते॑ । यः । च ।
सोमः॑ । राजा॑ । तयोः॑ । ए॒षः । आ॒तिथ्य॑म् । यत् । अ॒ग्नी॒षोमी॑य
इत्य॑ग्नी – सो॒मीयः॑ । अथ॑ । ए॒षः । रु॒द्रः । यः । ची॒यते॑ । यत् ।

स॒ञ्चित॑ इति॒ सं – चि॒ते । अ॒ग्नौ । ए॒तानि॑ । ह॒वी॒ष्णि॑ । न ।
निर्व॑पे॒दिति॑ निः – व॒पेत् । ए॒षः । ए॒व । रु॒द्रः । अ॒शान्तः॑ ।
उ॒पो॒त्था॒येत्यु॑प – उ॒त्था॒य । प्र॒जामि॑ति प्र – जा॒म् । प॒शून् ।
यज॑मानस्य । अ॒भी॒ति । म॒न्ये॒त । यत् । स॒ञ्चित॑ इति॒ सं-चि॒ते ।
अ॒ग्नौ । ए॒तानि॑ । ह॒वी॒ष्णि॑ । निर्व॑प॒तीति॑ निः – व॒पति॑ ।
भा॒ग॒धे॒येने॑ति भा॒ग – धे॒ये॒न । ए॒व । ए॒नम् । श॒म॒यति॑ । न । अ॒स्य ।
रु॒द्रः । अ॒शान्तः॑ । 39 (50)

TS 7.5.15.2

उ॒पो॒त्था॒य प्र॒जां प॒शून्भि॑ म॒न्यते॑ द॒श ह॒वी॒ष्णि॑ भव॒न्ति न॒व वै पु॒रु॒षे
प्रा॒णा नाभि॑र्द॒शमी॑ प्रा॒णाने॒व यज॑माने द॒धात्य॑थो द॒शाक्ष॑रा वि॒राड॑न्नं
वि॒राड् वि॒राज्ये॑वान्नाद्ये॒ प्रति॑ तिष्ठ॒त्यृतु॑भिर्वा ए॒ष छन्दो॑भिः स्तोमैः॑
पृ॒ष्ठैश्चे॑त॒व्य इत्या॑हु॒र्यदे॑तानि ह॒वी॒ष्णि॑ निर्व॑प॒त्यृतु॑भिरे॒वैनं
छन्दो॑भिः स्तोमैः॑ पृ॒ष्ठैश्चि॑नुते दि॒शः सुषु॑वा॒णेना॑ – [] 40

TS 7.5.15.2 - Padam

उपो॒त्थायेत्यु॑प – उ॒त्थाय॑ । प्र॒जामि॑ति प्र-जाम् । प॒शून् । अ॒भीति॑ ।
म॒न्यते॑ । द॒श । ह॒वी॒षि॑ । भ॒वन्ति॑ । न॒व । वै । पु॒रुषे॑ । प्रा॒णा इति॑
प्र – अ॒नाः । ना॒भिः । द॒शमी॑ । प्रा॒णानि॑ति प्र – अ॒नान् । ए॒व ।
यज॑माने । द॒धाति॑ । अथो॒ इति॑ । द॒शाक्ष॑रेति द॒श – अ॒क्षरा॑ ।
वि॒राडिति॑ वि – राट् । अ॒न्नम् । वि॒राडिति॑ वि – राट् ।
वि॒राजीति॑ वि – राजि॑ । ए॒व । अ॒न्नाद्य॑ इत्य॒न्न – अद्यै॑ । प्र॒तीति॑ ।
ति॒ष्ठति॑ । ऋ॒तुभि॑रित्यृ॒तु – भिः॑ । वै । ए॒षः ।
छ॒न्दोभि॑रिति छ॒न्दः – भिः॑ । स्तोमैः॑ । पृ॒ष्ठैः । चे॒तव्यः॑ । इति॑ ।
आ॒हुः । यत् । ए॒तानि॑ । ह॒वी॒षि॑ । नि॒र्वप॑तीति निः – व॒पति॑ ।
ऋ॒तुभि॑रित्यृ॒तु – भिः॑ । ए॒व । ए॒नम् । छ॒न्दोभि॑रिति छ॒न्दः – भिः॑ ।
स्तोमैः॑ । पृ॒ष्ठैः । चि॒नुते॑ । दि॒शः ।
सु॒षुवा॑णेन । 40 (50)

TS 7.5.15.3

अभिजित्या इत्याहु॑र्यदे॒तानि॑ ह॒वी॒षि॑ निर्व॒पति॑ दि॒शाम॑भिजित्या ए॒तया॑
वा इन्द्रं॑ दे॒वा अ॒याज॑यन् तस्मादिन्द्र॒सव॑ ए॒तया॑ म॒नुं म॒नुष्या॑स्तस्मान्-
मनु॒सवो॑ यथेन्द्रो दे॒वानां॑ यथा॒ मनु॑र्मनुष्याणामे॒वं भ॑वति य ए॒वं
वि॒द्वाने॒तये॑ष्या॒ यज॑ते दि॒ग्वतीः॑ पु॒रोऽनु॑वाक्या भवन्ति॒ सर्वा॑सां
दि॒शाम॑भिजित्यै ॥ 41

TS 7.5.15.3 - Padam

अभिजित्या इत्य॑भि - जि॒त्याः । इति॑ । आ॒हुः । यत् ।
ए॒तानि॑ । ह॒वी॒षि॑ । निर्व॒पतीति॑ निः - व॒पति॑ । दि॒शाम् ।
अभिजित्या इत्य॑भि - जि॒त्यै । ए॒तया॑ । वै । इन्द्र॑म् । दे॒वाः ।
अ॒याज॑यन् । तस्मा॑त् । इन्द्र॑सव इतीन्द्र - स॒वः । ए॒तया॑ । म॒नुम् ।
म॒नुष्याः॑ । तस्मा॑त् । म॒नुस॒व इति॑ म॒नु - स॒वः । यथा॑ । इन्द्रः॑ ।
दे॒वानाम् । यथा॑ । म॒नुः । म॒नुष्या॑णाम् । ए॒वम् । भ॒वति॑ । यः ।
ए॒वम् । वि॒द्वान् । ए॒तया॑ । इ॒ष्या । यज॑ते । दि॒ग्वती॑रिति दिक्-वतीः ।
पु॒रोऽनु॑वाक्या इति॑ पु॒रः-अ॒नुवा॑क्याः । भ॒वन्ति॑ । सर्वा॑साम् ।

दि॒शाम् । अ॒भिजि॑त्या इत्य॒भि – जि॒त्यै ॥ 41 (40)

॥
(अ॒शान्तः – सु॒षुवा॑णेनै – क॒चत्वा॑रि॒शच्च॑) (A15)

TS 7.5.16.1

यः प्रा॒णतो॑ नि॒मिष॑तो म॒हित्वै॑क इ॒द्राजा॑ जग॒तो ब॒भूव॑ ।

य ई॒शो अ॒स्य द्वि॒पद॑श्चतु॒ष्पदः॑ कस्मै॑ दे॒वाय॑ ह॒विषा॑ वि॒धेम ॥

उ॒पया॑मगृ॒हीतो॑ऽसि प्र॒जाप॑तये त्वा जु॒ष्टं गृ॒ह्णामि॑ तस्य॑ ते द्यौर्म॒हिमा॑

नक्ष॑त्राणि रू॒पमा॑दित्यस्ते तेज॒स्तस्मै॑ त्वा म॒हिम्ने॑ प्र॒जाप॑तये स्वाहा ॥ 42

TS 7.5.16.1 - Padam

यः । प्रा॒णत॑ इति प्र – अ॒नतः॑ । नि॒मिष॑त इति नि – मि॒षतः॑ ।

म॒हित्वे॑ति म॒हि – त्वा । ए॒कः । इत् । रा॒जा । जग॑तः । ब॒भूव॑ ॥ यः ।

ई॒शो । अ॒स्य । द्वि॒पद॑ इति द्वि – पदः । चतु॒ष्पद॑ इति चतुः – प॒दः ।

कस्मै॑ । दे॒वाय॑ । ह॒विषा॑ । वि॒धेम ॥ उ॒पया॑मगृ॒हीत॑ इत्यु॒पया॑म-गृ॒हीतः॑ ।

अ॒सि । प्र॒जाप॑तय इति प्र॒जा – प॒तये॑ । त्वा । जु॒ष्टम् । गृ॒ह्णामि॑ ।

तस्य॑ । ते । द्यौः । म॒हिमा॑ । नक्ष॑त्राणि । रू॒पम् । आ॒दित्यः॑ । ते ।

तेजः॑ । तस्मै॑ ॥ त्वा॑ । महि॒म्ने । प्र॒जाप॑तय इति प्र॒जा – प॒तये॑ ।

स्वाहा॑ ॥ 42 (38) (यः प्रा॑णतो द्यौरा॑दित्यो॑ – ऽष्टात्रिं॑शत्) (A16)

TS 7.5.17.1

य आ॒त्मदा॑ ब॒लदा॑ यस्य॑ वि॒श्व उपा॑सते प्र॒शिषं॑ य॒स्य दे॒वाः ।

यस्य॑ छा॒याऽमृतं॑ य॒स्य मृ॒त्युः कस्मै॑ दे॒वाय॑ ह॒विषा॑ वि॒धेम ॥

उप॒याम॑गृहीतोऽसि॑ प्र॒जाप॑तये त्वा जुष्टं॑ गृह्णामि॑ तस्य॑ ते पृथि॒वी

महि॒मौष॑धयो वनस्प॑तयो रू॒पम॒ग्निस्ते॑ तेज॒स्तस्मै॑ त्वा महि॒म्ने

प्र॒जाप॑तये स्वाहा॑ ॥ 43

TS 7.5.17.1 - Padam

यः । आ॒त्मदा॑ इत्या॒त्म – दाः । ब॒लदा॑ इति॑ ब॒ल – दाः । यस्य॑ ।

वि॒श्वे ॥ उपा॑सत इत्यु॒प – आ॑सते । प्र॒शिष॑मिति॑ प्र–शिष॑म् । यस्य॑ ।

दे॒वाः ॥ यस्य॑ । छा॒या । अ॒मृत॑म् । यस्य॑ । मृ॒त्युः । कस्मै॑ । दे॒वाय॑ ।

ह॒विषा॑ । वि॒धेम ॥ उप॒याम॑गृहीत इत्यु॒पयाम॑ – गृही॒तः । अ॒सि ।

प्र॒जाप॑तय इति॑ प्र॒जा – प॒तये॑ । त्वा । जुष्ट॑म् । गृह्णामि॑ । तस्य॑ । ते ।

पृथि॒वी । महि॒मा । ओष॑धयः । वनस्प॑तयः । रू॒पम् । अ॒ग्निः । ते ।

तेजः॑ । तस्मै॑ ॥ त्वा॑ । महि॒म्ने । प्र॒जाप॑तय॒ इति॑ प्र॒जा – प॒तये॑ ।

॥
स्वाहा ॥ 43 (39)

(य आ॒त्म॒दाः पृ॒थि॒व्य॒ग्नि॒-रे॒का॒न्न॒च॒त्वा॒रि॒शत्) (A17)

TS 7.5.18.1

आ ब्र॒ह्मन् ब्रा॒ह्म॒णो ब्र॒ह्मव॑र्च॒सी जा॑यता॒मा ऽस्मिन् रा॒ष्ट्रे रा॑ज॒न्य
इ॒ष॒व्यः शू॒रो म॒हा॒रथो॑ जा॑यतां॒ दो॒ग्ध्री॑धे॒नुर्वो॑ढा॒ अन॑ड्वाना॒शुः
स॒प्तिः पु॒रन्धि॑र्योषा॒ जि॒ष्णू रथे॑ष्ठाः स॒भेयो॑ यु॒वा ऽस्य॑ यज॒मान॑स्य
वी॒रो जा॑यतां॒ नि॒का॒मे॒नि॒का॒मे नः प॒र्जन्यो॑ व॒र्षतु॑ फ॒लि॒न्यो न
ओष॑धयः पच्यन्तां॒ यो॒गक्षे॑मो॒नः क॒ल्पतां॑ ॥ 44

TS 7.5.18.1 - Padam

ए॒ति । ब्र॒ह्मन् । ब्रा॒ह्म॒णः । ब्र॒ह्मव॑र्च॒सीति॑ ब्र॒ह्म-व॑र्च॒सी । जा॑यता॒म् ।
ए॒ति । अ॒स्मिन् । रा॒ष्ट्रे । रा॒ज॒न्यः । इ॒ष॒व्यः । शू॒रः । म॒हा॒रथ॑ इति॒
महा॑ – रथः । जा॑यता॒म् । दो॒ग्ध्री॑ । धे॒नुः । वो॒ढा । अन॑ड्वान् ।
आ॒शुः । स॒प्तिः । पु॒रन्धिः । योषा॑ । जि॒ष्णूः । रथे॑ष्ठा इति॒
रथे॑ – स्थाः । स॒भेयः॑ । यु॒वा ॥ ए॒ति । अ॒स्य । यज॑मानस्य । वी॒रः ।

जा॒य॒ताम् । नि॒का॒मे॒नि॒का॒म इति॑ नि॒का॒मे – नि॒का॒मे । नः । प॒र्ज॒न्यः ।
व॒र्ष॒तु । फ॒लि॒न्यः । नः । ओष॑धयः । प॒च्य॒न्ता॒म् ।
यो॒ग॒क्षे॒म इति॑ यो॒ग – क्षे॒मः । नः । क॒ल्प॒ता॒म् ॥ 44 (41)

(आ ब्र॒ह्म – त्रेक॑च॒त्वारि॒ंशत्) (A18)

TS 7.5.19.1

आऽक्रान् वा॒जी पृ॒थि॒वीम॒ग्निं यु॒ज॒म॒कृत॑ वा॒ज्य॒र्वा ऽऽक्रान् वा॒ज्य॒न्तरि॑क्षं
वा॒युं यु॒ज॒म॒कृत॑ वा॒ज्य॒र्वा द्यां वा॒ज्याऽक्र॑स्त सूर्यं यु॒ज॒म॒कृत॑
वा॒ज्य॒र्वा ऽग्नि॑स्ते वा॒जिन् यु॒ङ्ङ॒न् त्वा ऽऽ र॒भे स्व॑स्ति मा सं पा॒रय॑
वा॒युस्ते वा॒जिन् यु॒ङ्ङ॒न् त्वा ऽऽ र॒भे स्व॑स्ति मा सं – [] 45

TS 7.5.19.1 - Padam

एति॑ । अ॒क्रान् । वा॒जी । पृ॒थि॒वीम् । अ॒ग्निम् । यु॒जम् । अ॒कृत॑ ।
वा॒जी । अ॒र्वा । एति॑ । अ॒क्रान् । वा॒जी । अ॒न्तरि॑क्षम् । वा॒युम् ।
यु॒जम् । अ॒कृत॑ । वा॒जी । अ॒र्वा । द्याम् । वा॒जी । एति॑ । अ॒क्र॑स्त ।
सूर्य॑म् । यु॒जम् । अ॒कृत॑ । वा॒जी । अ॒र्वा । अ॒ग्निः । ते । वा॒जिन् ।
यु॒ङ् । अ॒न्विति॑ । त्वा । एति॑ । र॒भे । स्व॑स्ति । मा । स॒मिति॑ । पा॒रय॑ ।

वा॒युः । ते । वा॒जि॒न् । यु॒ङ् । अ॒न्वि॒ति । त्वा । ए॒ति । र॒भे । स्व॒स्ति ।
मा । स॒मि॒ति । 45 (50)

TS 7.5.19.2

पा॒रया ऽऽदि॒त्यस्ते॑ वा॒जि॒न् यु॒ङ्ङनु॑ त्वा ऽऽ र॒भे स्व॒स्ति मा सं पा॒रय
प्रा॒णधृ॑ग॒सि प्रा॒णं मे॑ दृ॒ह व्या॒नधृ॑ग॒सि व्या॒नं मे॑ दृ॒ह
ऽपा॒नधृ॑ग॒स्यपा॒नं मे॑ दृ॒ह चक्षु॑र॒सि चक्षु॑र्म॒यि धेहि॑ श्रो॒त्रम॑सि श्रो॒त्रं
म॒यि धे॒ह्यायु॑र॒स्यायु॑र्म॒यि धेहि॑ ॥ 46

TS 7.5.19.2 - Padam

पा॒रय । आ॒दि॒त्यः । ते । वा॒जि॒न् । यु॒ङ् । अ॒न्वि॒ति । त्वा । ए॒ति ।
र॒भे । स्व॒स्ति । मा । स॒मि॒ति । पा॒रय । प्रा॒णधृ॑गि॒ति प्रा॒ण – धृक् ।
अ॒सि । प्रा॒णमि॒ति प्र – अ॒नम् । मे॒ । दृ॒ह । व्या॒नधृ॑गि॒ति
व्या॒न – धृक् । अ॒सि । व्या॒नमि॒ति वि – अ॒नम् । मे॒ । दृ॒ह ।
अ॒पा॒नधृ॑गि॒त्यपा॒न – धृक् । अ॒सि । अ॒पा॒नमि॒त्यप – अ॒नम् । मे॒ ।
दृ॒ह । चक्षुः॑ । अ॒सि । चक्षुः॑ । म॒यि । धेहि॑ । श्रो॒त्रम् । अ॒सि ।

श्रो॑त्रम् । म॒यि॑ । धे॒हि॑ । आ॒युः॑ । अ॒सि॑ । आ॒युः॑ । म॒यि॑ ।

धे॒हि॑ ॥ 46 (43) (वा॒युस्ते॑ वा॒जिन् यु॒ङ्ङनु॑ त्वा ऽ र॒भे स्व॒स्ति मा
सं – त्रि॑च॒त्वारि॑ंश॒च्च) (A19)

TS 7.5.20.1

ज॒ज्ञि॑ बी॒जं व॑र्षा प॒र्जन्यः॑ प॒क्ता स॒स्य॑ सु॒पिप्प॒ला ओष॑धयः
स्व॒धिच॒रणेय॑ सु॒पस॒दनो॑ ऽग्निः स्व॒द्ध्यक्ष॑म॒न्तरि॑क्ष सु॒पावः॑ प॒वमानः॑
सू॒पस्था॒ना द्यौः शि॒वम॒सौ तप॑न् यथापूर्वम॒होरा॒त्रे पञ्च॑द॒शिनो॑
ऽर्ध॑मा॒सा-स्त्रि॑ंशिनो॒ मासाः॑ क्लृ॒प्ता ऋ॒तवः॑ शा॒न्तः
सँव॑त्सरः ॥ 47

TS 7.5.20.1 - Padam

ज॒ज्ञि॑ । बी॒जम् । व॑र्षा । प॒र्जन्यः॑ । प॒क्ता । स॒स्यम् । सु॒पिप्प॒ला इति॑
सु – पि॒प्प॒लाः । ओष॑धयः । स्व॒धिच॒रणेति॑ सु – अ॒धिच॒रणा॑ ।
इ॒यम् । सू॒पस॒दन इति॑ सु – उ॒पस॒दनः॑ । अ॒ग्निः । स्व॒द्ध्यक्ष॑मिति॑
सु – अ॒द्ध्यक्ष॑म् । अ॒न्तरि॑क्षम् । सु॒पाव इति॑ सु-पावः॑ । प॒वमानः॑ ।
सू॒पस्था॒नेति॑ सु – उ॒पस्था॒ना । द्यौः । शि॒वम् । अ॒सौ । तप॑न् ।

य॒था॒पू॒र्वमि॑ति॒ यथा॑ – पू॒र्वम् । अ॒हो॒रा॒त्रे इ॒त्यहः॑ – रा॒त्रे । प॒ञ्चद॒शि॒न॒
इति॑ प॒ञ्च – द॒शि॒नः । अ॒र्ध॒मा॒सा इ॒त्यर्ध॑ – मा॒साः ।

त्रि॒ंश॒तिः । मा॒साः । क्लृ॒प्ताः । ऋ॒तवः॑ । शा॒न्तः । स॒व॒त्स॒र इति॑
सं – व॒त्स॒रः ॥ 47 (31) (ज॒ज्ञि बी॒ज – मे॒क॒त्रिं॒शत्) (A20)

TS 7.5.21.1

आ॒ग्ने॒योऽष्टा॑क॒पालः॑ सौ॒म्यश्च॒रुः सा॒वि॒त्रोऽष्टा॑क॒पालः॑ पौ॒ष्णश्च॒रुः
रौ॒द्रश्च॒रु॒र॒ग्नये॑ वै॒श्वान॒राय॑ द्वा॒द॒श॒क॒पा॒लो मृ॒गा॒ख॒रे यदि॑
नाऽऽ॒गच्छे॑-द॒ग्नये॑-ऽहो॒मु॒चे-ऽष्टा॑क॒पालः॑ सौ॒र्यं प॒यो वा॒यव्य॑
आ॒ज्य॒भागः॑ ॥ 48

TS 7.5.21.1 - Padam

आ॒ग्ने॒यः । अ॒ष्टा॒क॒पा॒ल इ॒त्यष्टा॑ – क॒पा॒लः । सौ॒म्यः । च॒रुः ।
सा॒वि॒त्रः । अ॒ष्टा॒क॒पा॒ल इ॒त्यष्टा॑ – क॒पा॒लः । पौ॒ष्णः । च॒रुः । रौ॒द्रः ।
च॒रुः । अ॒ग्नये॑ । वै॒श्वान॒राय॑ । द्वा॒द॒श॒क॒पा॒ल इति॑ द्वा॒द॒श – क॒पा॒लः ।
मृ॒गा॒ख॒र इति॑ मृ॒ग – आ॒ख॒रे । यदि॑ । न । आ॒गच्छे॑दि॒त्या-गच्छे॑त् ।
अ॒ग्नये॑ । अ॒हो॒मु॒च इ॒त्यहः॑-मु॒चे । अ॒ष्टा॒क॒पा॒ल इ॒त्यष्टा॑-क॒पा॒लः ।

सौर्यम् । पयः । वायव्यः । आज्यभाग इत्याज्य – भागः ॥ 48 (24)

(आग्नेय – श्वतुर्विंशतिः) (A21)

TS 7.5.22.1

अ॒ग्नये॑-ऽहो॒मुचे॑-ऽष्टा॒कपाल॑ इन्द्रा॒याऽहो॒मुच॑ एका॒दश॑कपालो
मि॒त्रावरु॑णाभ्या-मा॒गोमु॒ग्भ्यां॑ पय॒स्या वा॒योसा॒वित्र आ॒गोमु॒ग्भ्यां॑
चरु॒रश्वि॑भ्या-मा॒गोमु॒ग्भ्यां॑ धा॒ना मरु॑द्भ्य ए॒नोमु॒ग्भ्यः सप्त॑कपालो
वि॒श्वेभ्यो॑ दे॒वेभ्य॑ ए॒नोमु॒ग्भ्यो द्वा॑दशकपालो ऽनु॒मत्यै॑ चरु॒रग्नये॑
वैश्वान॒राय द्वा॑दशकपालो द्यावा॒पृथि॒वीभ्या॑-म॒होमु॒ग्भ्यां॑

द्विकपालः ॥ 49

TS 7.5.22.1 - Padam

अ॒ग्नये॑ । अ॒होमु॒च इत्य॑हः-मु॒चे॑ । अ॒ष्टाक॑पाल इत्य॒ष्टा-क॒पालः ।
इन्द्रा॒य । अ॒होमु॒च इत्य॑हः – मु॒चे॑ ।
एका॒दश॑कपाल इत्येका॒दश – क॒पालः ।
मि॒त्रावरु॑णामि॒ति मि॒त्रा – वरु॑णाभ्याम् ।
आ॒गोमु॒ग्भ्यामि॒त्यागो॒मुक् – भ्याम्॑ । पय॒स्या ।

वा॒यो॒सा॒वि॒त्र इति॑ वा॒यो – सा॒वि॒त्रः ।

आ॒गो॒मुग्भ्या॒मित्या॒गो॒मुक् – भ्या॒म् । च॒रुः ।

अ॒श्वि॒भ्या॒मित्य॒श्वि – भ्या॒म् । अ॒गो॒मुग्भ्या॒मित्या॒गो॒मुक् – भ्या॒म् ।

धा॒नाः । म॒रुद्भ्य॒ इति॑ म॒रुत् – भ्यः॒ । ए॒नो॒मुग्भ्य॒ इत्ये॒नो॒मुक् – भ्यः॒ ।

स॒प्त॒क॒पा॒ल इति॑ स॒प्त – क॒पा॒लः । वि॒श्वे॒भ्यः॑ । दे॒वे॒भ्यः॑ । ए॒नो॒मुग्भ्य॒

इत्ये॒नो॒मुक् – भ्यः॒ । द्वा॒द॒श॒क॒पा॒ल इति॑ द्वा॒द॒श – क॒पा॒लः ।

अ॒नु॒म॒त्या इत्य॑नु – म॒त्यै । च॒रुः । अ॒ग्नये॑ । वै॒श्वान॑राय ।

द्वा॒द॒श॒क॒पा॒ल इति॑ द्वा॒द॒श – क॒पा॒लः । द्या॒वा॒पृ॒थि॒वी॒भ्या॒मिति॑

द्या॒वा – पृ॒थि॒वी॒भ्या॒म् । अ॒हो॒मुग्भ्या॒मित्य॑हो॒मुक् – भ्या॒म् ।

द्वि॒क॒पा॒ल इति॑ द्वि – क॒पा॒लः ॥ 49 (30)

(अ॒ग्नये॑हो॒मुचै॑ – त्रि॒ंशत्) (A22)

TS 7.5.23.1

अ॒ग्नये॑ स॒मन॑मत् पृ॒थि॒व्यै स॒मन॑मद्यथा॒ग्निः पृ॒थि॒व्या स॒मन॑मदे॒वं
म॒ह्यं भ॒द्राः सं॒नत॑यः सं॒ नम॑न्तु वा॒यवे॑ स॒मन॑मदन्तरि॒क्षाय॑ स॒मन॑मद्यथा॒
वा॒युर॑न्तरि॒क्षेण॑ सू॒र्याय॑ स॒मन॑मद्वि॒वे स॒मन॑मद्यथा॒ सू॒र्यो दि॒वा च॒न्द्रम॑से॒

स॒म॒न॒म॒न्नक्ष॑त्रेभ्यः स॒म॒न॒म॒द्यथा॑ च॒न्द्र॒मा नक्ष॑त्रैर्व॒रु॒णाय॑

स॒म॒न॒म॒द॒भ्यः स॒म॒न॒म॒द्यथा॑ – [] 50

TS 7.5.23.1 - Padam

अ॒ग्नये॑ । स॒मि॒ति । अ॒न॒म॒त् । पृ॒थि॒व्यै । स॒मि॒ति । अ॒न॒म॒त् । यथा॑ ॥
अ॒ग्निः । पृ॒थि॒व्या । स॒म॒न॒म॒दि॒ति सं – अ॒न॒म॒त् । ए॒वम् । म॒ह्यम् ॥
भ॒द्राः । सं॒न॒तय॑ इति॒ सं – न॒तयः॑ । स॒मि॒ति । न॒म॒न्तु । वा॒यवे॑ ॥
स॒मि॒ति । अ॒न॒म॒त् । अ॒न्त॒रि॒क्षाय॑ । स॒मि॒ति । अ॒न॒म॒त् । यथा॑ । वा॒युः ।
अ॒न्त॒रि॒क्षेण॑ । सू॒र्याय॑ । स॒मि॒ति । अ॒न॒म॒त् । दि॒वे । स॒मि॒ति ।
अ॒न॒म॒त् । यथा॑ । सू॒र्यः । दि॒वा । च॒न्द्र॒म॒से । स॒मि॒ति । अ॒न॒म॒त् ।
नक्ष॑त्रेभ्यः । स॒मि॒ति । अ॒न॒म॒त् । यथा॑ । च॒न्द्र॒माः । नक्ष॑त्रैः ।
व॒रु॒णाय॑ । स॒मि॒ति । अ॒न॒म॒त् । अ॒द्भ्य इत्य॑त् – भ्यः । स॒मि॒ति ।
अ॒न॒म॒त् । यथा॑ ॥ 50 (50)

TS 7.5.23.2

व॒रु॒णोऽ॒द्भिः सा॒म्ने स॒म॒न॒म॒दृ॒चे स॒म॒न॒म॒द्यथा॑ सा॒म॒र्चा ब्र॒ह्म॒णे
स॒म॒न॒म॒त् क्ष॒त्राय॑ स॒म॒न॒म॒द्यथा॑ ब्र॒ह्म क्ष॒त्रेण॑ रा॒ज्ञे स॒म॒न॒म॒द्-वि॒शे

सम॑नम॒द्यथा॑ रा॒जा वि॒शा रथा॑यः सम॑नम॒दश्चै॑भ्यः सम॑नम॒द्यथा॑
रथोऽ॒श्चैः प्र॒जाप॑तये सम॑नम॒द्-भू॒तेभ्यः॑ सम॑नम॒द्यथा॑ प्र॒जाप॑तिर्भू॒तैः
सम॑नम॒देवं॑ म॒ह्यं () भ॒द्राः सं॑नतयः सं॑ नमन्तु ॥ 51

TS 7.5.23.2 - Padam

वरु॑णः । अ॒द्भिरि॑त्यत् – भिः । साम्ने॑ । समि॑ति । अ॒नम॑त् । ऋ॒चे ।
समि॑ति । अ॒नम॑त् । यथा॑ । साम् । ऋ॒चा । ब्र॒ह्म॑णे । समि॑ति ।
अ॒नम॑त् । क्ष॒त्राय॑ । समि॑ति । अ॒नम॑त् । यथा॑ । ब्र॒ह्म । क्ष॒त्रेण॑ । रा॒ज्ञे ।
समि॑ति । अ॒नम॑त् । वि॒शे । समि॑ति । अ॒नम॑त् । यथा॑ । रा॒जा ।
वि॒शा । रथा॑य । समि॑ति । अ॒नम॑त् । अ॒श्चै॑भ्यः । समि॑ति । अ॒नम॑त् ।
यथा॑ । रथः॑ । अ॒श्चैः । प्र॒जाप॑तय इति प्र॒जा – प॑तये । समि॑ति ।
अ॒नम॑त् । भू॒तेभ्यः॑ । समि॑ति । अ॒नम॑त् । यथा॑ । प्र॒जाप॑तिरिति
प्र॒जा – प॑तिः । भू॒तैः । सम॑नम॒दिति॑ सं-अ॒नम॑त् । ए॒वम् ।
म॒ह्यम् () । भ॒द्राः । सं॑नतय इति सं – न॒तयः॑ । समि॑ति ।
नम॑न्तु ॥ 51 (54)(अ॒द्भ्यः सम॑नम॒द्यथा-म॒ह्यं-च॒त्वारि॑ च) (A23)

TS 7.5.24.1

ये ते पन्थानः सवितः पू॒र्व्यासो॑ऽरेणवो वित॑ता अ॒न्तरि॑क्षे ।
तेभि॑र्नो अ॒द्य प॒थिभिः॑ सु॒गेभी॑ रक्षा च नो अधि च देव ब्रू॑हि ॥
नमो॑ऽग्नये॑ पृथि॒वि॒क्षिते॑ लो॒क॒स्पृते॑ लो॒क॒म॒स्मै यज॑मानाय देहि
नमो॑ वा॒यवे॑ऽन्तरि॒क्ष॒क्षिते॑ लो॒क॒स्पृते॑ लो॒क॒म॒स्मै यज॑मानाय देहि
नमः॑ सू॒र्याय॑ दि॒वि॒क्षिते॑ लो॒क॒स्पृते॑ लो॒क॒म॒स्मै यज॑मानाय देहि ॥ 52

TS 7.5.24.1 - Padam

ये । ते । पन्थानः । स॒वि॒तः । पू॒र्व्या॒सः । अ॒रे॒ण॒वः । वि॒त॒ता इति॑
वि – त॒ताः । अ॒न्त॒रि॒क्षे ॥ तेभिः॑ । नः । अ॒द्य । प॒थि॒भि॒रिति॑
प॒थि – भिः॑ । सु॒गे॒भि॒रिति॑ सु – गेभिः॑ । रक्षा । च । नः । अधीति॑ ।
च । दे॒व । ब्रू॑हि ॥ नमः॑ । अ॒ग्नये॑ । पृथि॒वि॒क्षित॑ इति॑ पृथि॒वि॒क्षिते॑ ।
लो॒क॒स्पृ॒त इति॑ लो॒क – स्पृ॒ते । लो॒क॒म् । अ॒स्मै । यज॑मानाय ।
देहि॑ । नमः॑ । वा॒यवे॑ । अ॒न्त॒रि॒क्ष॒क्षित॑ इत्यन्तरि॒क्ष – क्षिते॑ ।
लो॒क॒स्पृ॒त इति॑ लो॒क – स्पृ॒ते । लो॒क॒म् । अ॒स्मै । यज॑मानाय ।

दे॒हि । न॒मः । सू॒र्या॒य । दि॒वि॒क्षि॒त इति॑ दि॒वि – क्षि॒ते॑ । लो॒क॒स्पृ॒त
इति॑ लो॒क – स्पृ॒ते॑ । लो॒क॒म् । अ॒स्मै । य॒ज॒मा॒ना॒य । दे॒हि ॥ 52 (44)

(ये ते – चतुश्चत्वारिंशत्) (A24)

TS 7.5.25.1

यो वा अ॒श्व॒स्य॒ मे॒द्ध्य॒स्य॒ शि॒रो वे॒द शी॒र्ष॒ण्वान् मे॒द्ध्यो
भ॒वत्यु॒षा वा अ॒श्व॒स्य॒ मे॒द्ध्य॒स्य॒ शि॒रः सू॒र्यश्चक्षु॑र्वा॒तः प्रा॒णश्च॒न्द्र॒माः
श्रो॒त्रं दि॒शः पा॒दा अ॒वा॒न्त॒र॒दि॒शाः प॒र्श॒वोऽहो॒रा॒त्रे नि॒मेषो॑ऽर्ध॒मा॒साः
प॒र्वा॒णि मा॒साः स॒न्धा॒ना॒न्य॒त॒वोऽङ्गानि॑ सँव॒त्स॒र आ॒त्मा रश्म॑यः के॒शा
नक्ष॑त्राणि रू॒पं ता॒र॒का अ॒स्थानि॑ न॒भो मा॒स॒ान्योष॑धयो
लो॒मानि॑ व॒न॒स्प॒त॒यो वा॒ला अ॒ग्नि॒र्मुखं॑ वै॒श्वान॒रो व्या॒त्तः – [] 53

TS 7.5.25.1 - Padam

यः । वै । अ॒श्व॒स्य॒ मे॒द्ध्य॒स्य॒ शि॒रः । वे॒द । शी॒र्ष॒ण्वानि॑ति
शी॒र्ष॒ण्वान् । मे॒द्ध्यः॑ । भ॒व॒ति॑ । उ॒षाः । वै । अ॒श्व॒स्य॒ ।
मे॒द्ध्य॒स्य॒ शि॒रः । सू॒र्यः॑ । चक्षुः॑ । वा॒तः । प्रा॒ण इति॑ प्र – अ॒नः ।

च॒न्द्र॒माः॑ । श्रो॒त्र॒म् । दि॒शः॑ । पा॒दाः॑ ।

अ॒वा॒न्त॒र॒दि॒शा इत्य॑वा॒न्त॒र – दि॒शाः॑ । प॒र्श॒वः॑ ।

अ॒हो॒रा॒त्रे इत्य॑हः – रा॒त्रे । नि॒मेष॑ इति॒ नि – मेषः॑ ।

अ॒र्ध॒मा॒सा इत्य॑र्ध – मा॒साः॑ । प॒र्वा॒णि । मा॒साः॑ । सं॒धा॒ना॒नीति॑

सं – धा॒ना॒नि । ऋ॒त॒वः॑ । अ॒ङ्गा॒नि । सँ॒व॒त्स॒र इति॑ सं – व॒त्स॒रः॑ ।

आ॒त्मा । र॒श्म॒यः॑ । के॒शाः॑ । नक्ष॑त्राणि । रू॒प॒म् । ता॒र॒काः॑ । अ॒स्थानि॑ ।

न॒भः॑ । मा॒ञ्सा॒नि । ओष॑धयः । लो॒मानि॑ । व॒न॒स्प॒त॒यः॑ । वा॒लाः॑ ।

अ॒ग्निः॑ । मु॒ख॒म् । वै॒श्वान॑रः । व्या॒त्त॒मि॒ति वि – आ॒त्त॒म् । 53 (50)

TS 7.5.25.2

स॒मु॒द्र उ॒द॒र॒म॒न्त॒रि॒क्षं पा॒यु-र्धा॒वापृ॑थि॒वी आ॒ण्डौ ग्रा॒वा शो॒पः॑

सो॒मो रे॒तो यज्ज॑ञ्ज॒भ्यते॑ तद्वि द्यो॒तते॑ यद्विधू॒नुते॑ तथ् स्त॒नय॑ति

यन्मे॑हति॒ तद्वर्ष॑ति वा॒गेवा॒स्य वा॒ग॒ह॒र्वा अ॒श्वस्य॑ जा॒यमा॑नस्य म॒हि॒मा

पु॒रस्ता॑ज्जा॒यते॑ रा॒त्रिरे॑नं म॒हि॒मा प॒श्चाद॑नु जा॒यत॑ ए॒तौ वै म॒हि॒मा॒ना-

व॒श्वम॑भि॒तः सं ब॑भूवतु॒र्हयो॑ दे॒वान॑व॒ह () द॒र्वाऽसु॑रान् वा॒जी ग॒न्ध

वा॒नश्चो॑मनु॒ष्यान्थ् स॒मु॒द्रो वा अ॒श्वस्य॑ यो॒निः स॒मु॒द्रो ब॒न्धुः॑ ॥ 54

TS 7.5.25.2 - Padam

समु॒द्रः । उ॒दर॑म् । अ॒न्तरि॑क्षम् । पा॒युः । द्या॒वापृ॑थि॒वी इति॑
द्या॒वा – पृ॒थि॒वी । आ॒ण्डौ । ग्रा॒वा । शे॒पः । सोमः॑ । रे॒तः । यत् ।
ज॒ञ्ज॒भ्यते॑ । तत् । वी॒ति । द्यो॒त॒ते । यत् । वि॒धू॒नु॒त इति॑ वि॒धू॒नु॒ते ।
तत् । स्त॒न॒य॒ति । यत् । मे॒ह॒ति । तत् । व॒र्ष॒ति । वाक् । ए॒व ।
अ॒स्य । वाक् । अ॒हः । वै । अ॒श्व॒स्य । जा॒य॒मा॒न॒स्य । म॒हि॒मा ।
पु॒र॒स्ता॒त् । जा॒य॒ते । रा॒त्रिः । ए॒न॒म् । म॒हि॒मा । प॒श्चा॒त् । अ॒न्वि॒ति ।
जा॒य॒ते । ए॒तौ । वै । म॒हि॒मा॒नौ । अ॒श्व॒म् । अ॒भि॒तः । स॒मि॒ति ।
ब॒भू॒व॒तुः । ह॒यः । दे॒वा॒न् । अ॒व॒ह॒त् () । अ॒र्वा । अ॒सु॒रा॒न् । वा॒जी ।
ग॒न्ध॒र्वा॒न् । अ॒श्वः । म॒नु॒ष्या॒न् । समु॒द्रः । वै । अ॒श्व॒स्य । यो॒निः ।
समु॒द्रः । ब॒न्धुः ॥ 54 (62)

(व्या॒त्त – म॒व॒ह॒द् – द्वा॒द॒श च) (A25)

Prasna Korvai with starting Padams of 1 to 25 Anuvaakams :-

(गावो॑ – गावः॑ सि॒षास॑न्तीः – प्र॒थमे॑ मा॒सि – समा॑न्यो – यदि॑
सोमो॑ – षड॒है – रु॒थ् सृ॑ज्या(३)न् – दे॒वाना॑ – म॒र्क्येण॑ – च॒र्माऽव॑
– पृ॒थिव्यै॑ – द॒त्वते॑ – क॒स्त्वा – ऽग्नये॑ – यो वै – यः प्रा॑णतो –
य आ॑त्मदा – आ ब्र॒ह्म – त्नाऽक्रान्॑ – ज॒ज्ञि बी॑ज –
मा॒ग्नेयो॑ऽष्टाक॑पालो – ऽग्नये॑ऽहो॒मुचे॑ऽष्टाक॑पालो – ऽग्नये॑सम॑नम॒द्
– ये ते॑ प॒न्थानो॑ – यो वा अ॒श्वस्य॑मे॒द्ध्यस्य॑ शि॒रः –
पञ्च॑वि॒ंशतिः॑)

Korvai with starting Padams of 1, 11, 21 Series of Panchaatis :-

(गावः॑ – समा॑न्यः – स॒वनम॑ष्टाभि – वा ए॒ते दे॒वकृ॑तञ्चा –
ऽभि॒जित्या॑ इ॒त्याहु॑ – र्व॒रुणो॑ऽद्भिः साम्ने॑ – च॒तुष् पञ्चा॑सत्)

पद पाठे (वाक्य सहित) – सप्तमकाण्डे – पञ्चमः प्रश्नः

First and Last Padam of fifth Prasnam of 7th Kandam :-

(गावः – समुद्रो बन्धुः)

Kaanda Korvai with starting Padams of all 5 Prasnam of Kandam 7

प्रजन॑न॒ – सा॒द्याः – प्र॒ज॒वं – बृ॒ह॒स्प॒ति – गा॒वः – प॒ञ्च

Samhita Korvai with starting Padams of all Seven Kandams

इ॒षे – वा॒य॒व्यं – प्र॒जा॒प॒ति – यु॒ञ्ज॒नाः – सा॒वि॒त्रा॒णि –
प्रा॒ची॒न॒व॒शो – प्र॒ज॒न॒न॒ – स॒प्त

॥ हरिः ओं ॥

॥ कृष्ण यजुर्वेदीय तैत्तिरीय संहितायां पद पाठे

सप्तमकाण्डे पञ्चमः प्रश्नः समाप्तः ॥

॥ इति सप्तमं काण्डं ॥

॥ इति तैत्तिरीयसंहिता समाप्ता ॥

पद पाठे (वाक्य सहित) – सप्तमकाण्डे – पञ्चमः प्रश्नः

Details of Panchati and Padam for Kandam 7, Prasanam 5 (TS 7.5)

	Panchati	Padams
Anuvakam 1	6	313
Anuvakam 2	2	102
Anuvakam 3	2	84
Anuvakam 4	2	102
Anuvakam 5	2	119
Anuvakam 6	4	215
Anuvakam 7	4	220
Anuvakam 8	5	261
Anuvakam 9	4	181
Anuvakam 10	1	49
Anuvakam 11	2	102
Anuvakam 12	2	102
Anuvakam 13	1	38
Anuvakam 14	1	47
Anuvakam 15	3	140
Anuvakam 16	1	38
Anuvakam 17	1	39
Anuvakam 18	1	41
Anuvakam 19	2	93

पद पाठे (वाक्य सहित) – सप्तमकाण्डे – पञ्चमः प्रश्नः

Anuvakam 20	1	31
Anuvakam 21	1	24
Anuvakam 22	1	30
Anuvakam 23	2	104
Anuvakam 24	1	44
Anuvakam 25	2	112
Total →	54	2631

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in